

摘藻堂四庫全書薈要

史部

欽定四庫全書叢要

史部

御批通鑑綱目卷三十一

詳校官編修
臣汪鏞



欽定四庫全書薈要卷七千三百四十三

史部

御批資治通鑑綱目卷三十一

起丙午梁武帝普通七年魏孝明帝孝昌二年○凡
盡壬子梁武帝中大通四年魏孝武帝永熙元年

三年

丙午

普通七年

春正月魏以楊津為北道大都督

牛魏孝昌二年

初魏都督廣陽王深通於尚書令城陽王徽之妃徽
怨之言於太后以深心不可測乃以津為都督代深

魏五原降戶鮮于脩禮反○二月魏西部敕勒斛律洛

陽反三月爾朱榮討平之○夏四月魏以元順為太常

卿

城陽王徽與黃門侍郎徐紇毀侍中元順出為太常卿順奉辭時紇侍側順指之曰此魏之宰詔魏國不亡此終不死紇脇肩而出順叱之曰爾刀筆小才正堪供几案之用豈應汙辱門下歟我彛倫因振衣而起太后集覽宰詔詔披美反吳越春秋曰伯詔晉伯默然集覽宗之後楚伯州黎之子也平王誅伯州黎其子詔奔吳為太宰後越滅吳以詔不忠誅之歟我彛倫書洪範篇彛倫攸斃蔡氏傳曰彛常倫理也所謂秉彛人倫也歟音多路反敗也

魏朔州鮮于阿胡反○魏都督李琚討杜洛周敗死○魏長孫稚討鮮于脩禮敗績

魏以長孫稚為大都督討鮮于脩禮行至鄴復以河間王琛代之稚言與琛有私隙難受其節度不聽至淳沱脩禮邀擊之琛不救稚大敗皆坐除名

五月元畧自梁歸于魏魏以為侍中

畧自至江南晨夕哭泣常如居喪及魏元又死胡太后遣江革祖暉之南還以求畧梁主禮遣之太后拜畧侍中賜爵東平王遷尚書令委任之然徐鄭用事畧亦不敢違也

書法

凡奔書歸善辭也猶有宗國之心焉故善之是故劉敬宣司馬休之書來歸元畧書歸元

或書歸賀拔勝書歸獨孤信書歸皆善之也

魏復以廣陽王深為北道大都督

魏復以深為大都督討鮮于脩禮章武王融裴衍為左右都督並受節度城陽王徽復譖其有異志后敕融衍潛為之備深懼事無大小不敢自決后使問其故對曰徽銜臣次骨朝夕欲陷臣於不測之誅臣何以自安陛下若使徽出臨外州臣無內顧之憂庶可以畢命賊庭展其忠力太后不聽徽與鄭儼等更相阿黨外似柔謹內實忌克賞罰任情魏政愈亂

書法

復以為何嘉改過也深嘗為北道都督矣城陽王徽譖之於是代深今而復用是也而使

元融裴衍潛為之備疑人勿任任人勿疑於此復兩失之卒之使深盤桓自疑而為葛榮所殺綱目書此予之也亦惜之也

秋七月魏行臺常景敗杜洛周於范陽○鮮于阿胡陷

魏平城○八月賊帥元洪業殺鮮于脩禮降魏其黨葛

榮復殺洪業而自立考異

自立當作
自領其衆

考證

立當作
領其衆

○魏

安北將軍爾朱榮執肆州刺史而以爾朱羽生代之

魏以榮為安北將軍都督恒朔二州軍事榮過肆州
刺史尉慶賓忌之不出榮怒襲執之署其從叔羽生
為刺史魏朝不能制初賀拔允及弟勝岳在恒州平
城陷岳奔榮勝奔肆州至是榮得勝大喜曰得卿兄
弟天下不足平也以為別
將軍中大事多與之謀

書法

刺史何尉慶賓也曷為不名執善辭也慶賓
無備以至被執則非力屈者矣然則何以不

書襲不書襲書執所以見爾朱之強也刺史專方
面本兵柄而易置之如奕棊爾朱不臣之跡兆於

此矣故謹書之是故書執肆州刺史以羽生代之所以著爾朱之無君書以白文珂為西京留守所以著郭威之無君也

葛榮襲殺魏都督章武王融廣陽王深

葛榮既得杜洛周之衆北趣瀛州魏廣陽王深引兵躡之榮輕騎掩擊章武王融殺之自稱天子深聞融敗不進侍中元晏宣言於太后曰廣陽王盤桓不進坐圖非望有于謹者智畧過人為其謀主風塵之際恐非陛下之純臣也太后詔勝省門募能獲謹者有重賞謹聞之謂深曰今女主臨朝信用讒佞苟不明白殿下素心恐禍至無日謹請束身歸罪遂詣勝下有司以聞太后引見大怒謹備論深忠款兼陳停軍之狀太后意解捨之深引軍還趣定州刺史楊津亦疑深有異志遣都督毛諡討深深間行至博陵逢葛

榮遊騎劫以詣榮賊徒見深頗有喜者榮惡而殺之
城陽王徽遂誣深降賊錄其妻子深府佐宋遊道為
之訴理
乃得釋

就德興陷魏平州○莫折念生降魏既而復反破六韓
拔陵誘胡琛殺之

天水民呂伯度本莫折念生之黨也亡歸胡琛琛資
以士馬使擊念生屢破其軍乃復叛琛東引魏軍念
生窘迫乞降蕭寶寅使左丞崔士和據秦州大都督
元脩義停軍不進念生復反執士和殺之久之伯度
亦為万俟醜奴所殺賊勢益盛寶寅不能制琛與念
生交通事破六韓拔陵浸慢拔陵誘琛斬之醜奴蓋
并其
衆

冬十一月梁侵魏取壽陽

梁主乘淮堰水盛遣豫州刺史夏侯亶等侵魏魏揚州刺史李憲以壽陽降梁陳慶之入據其城凡降城五十二獲男女七萬五千復以壽陽為豫州改合肥為南豫州以夏侯亶為二州刺史壽陽久罹兵革民多流散亶輕刑薄賦務農省役頃之民戶充復胡氏曰梁武三築淮堰至是十年死者蓋數十萬人然後能取壽陽纔得七萬五千口是十年勞費以三四人而易一人其愚拙不亦甚哉興師動衆不得已而至於殺者惟誅亂臣討賊子為可以所治之事所存之理有大於殺也若夫貪憤之兵得已不已而視人如草芥者雖得之必失之故國君惟好仁則天下無敵梁主欲以此道而規河南不亦左乎

集覽 貪憤之兵前漢魏相曰利人土地貨寶者謂之貪兵兵貪者破爭恨小故不思念怒者謂之憤兵兵憤者敗

書法

於是降城五十二獲男女七萬五千人初蕭綜既叛梁主密召夏侯亶還曰侯淮堰成復

進至是淮堰水盛亶復侵魏李憲遂降則淮堰益三脩矣其不書何削之也淮堰再築再壞死者無慮數十萬人於是三脩其損費又可知矣而所獲未償所失四分之一故削之削之者不以壽陽之得歸之堰也

魏幽州民執行臺常景叛降杜洛周

魏盜賊日滋征討不息國用耗竭豫徵六年租調猶不足乃罷百官酒肉稅入市者人一錢百姓嗟怨吏部郎中辛雄上疏曰夷夏之民相聚為亂豈有餘憾哉正以守令不得其人百姓不堪其命故也宜及此時早加慰撫但郡縣選舉由來其輕貴遊雋才莫肯居此宜改其弊妙盡才望不拘停年三載黜陟稱職

著補在京名官不歷守令不得為內職
則人思自勉枉屈可申彊暴息矣不聽

丁梁大通元年春正月葛榮陷魏殷州刺史崔楷死之
未魏孝昌三年

榮遂圍冀州

魏分定相二郡置殷州以崔楷為刺史楷表乞兵糧
不得或勸楷單騎之官楷曰吾聞食人之祿者憂人
之憂吾獨往將士誰肯固志哉遂舉家之官葛榮逼
城或勸減弱小避之楷遣幼子及一女夜出既而悔
之曰人謂吾心不固虧忠而全愛也遂追還賊至將
士爭奮皆曰崔公尚不惜百口吾屬何愛一身連戰
不息死者相枕終無叛志城陷
楷執節不屈榮殺之遂圍冀州
質實
殷州按一統志
晉初所置治獲
嘉縣後魏因之北齊省入脩武縣唐初復
置尋廢之故城在衛輝府城西北一百里

書法

自六鎮之叛陷州郡多矣未有以死節書於是書崔楷若楷者可謂知難不避者矣故特

書以嘉之

發明

綱目立法極謹嚴如葛榮之事不曰魏葛榮陷殷州而曰葛榮陷魏殷州則以是時賊勢

彊盛非魏之所得而制故書法如此見其若一敵國然者若夫魏自破六韓拔陵之反至是凡五載破軍殺將多矣獨一崔楷能執節不屈故綱目特書而予之以不以亂亡之世而沒其實此亦世亂識忠臣之意也

魏蕭寶寅討莫折念生敗績魏以楊椿為行臺

寶寅出兵累年將士疲弊至是大敗於涇陽汧城岐州皆降於賊幽州刺史畢祖暉戰沒關中大擾雍州

刺史楊椿募民拒守詔以椿為行臺節度關西諸將
右民郎路思令上疏曰比年將帥多罷貴子孫軒眉
攘腕以攻戰自許及臨大敵銳氣頓盡乃令羸弱居
前以當寇彊壯在後以衛身器械不精進止無節以
當負險之衆敵數戰之虜欲不敗可得乎是以兵知
必敗始集而先逃將帥畏敵遷延而不進國家謂官
賞尚輕屢加寵賚帑藏空竭民財殫盡遂使賊徒益
甚生民彫弊凡以此也夫德可感義夫恩可勸死士
今若明賞罰練士卒脩器械先遣辨士曉以禍福如
其不悛以順討逆何異勵蕭斧而伐朝菌鼓洪爐而
燎毛髮

集覽

右民郎官名也蕭斧蕭艾蒿也白華莖
歲弗聽

麤科生多者至數十莖可作燭有香氣

說文蕭斧艾艾之斧也朝菌菌求敏反地芝也槐樹
上生者良野田中者恐有毒陶隐居云山中多有毒
菌地漿可解之爾雅中廔菌注地葦也似葢今江
東名為土菌亦曰廔菌莊子朝菌不知晦朔郭象注

芝生於朝死於暮故曰朝菌林希逸口義云朝菌一名日及生於糞上暮生見日則死彼但知有朝暮而已
正誤右民郎今按謂右民曹之郎官也漢成帝置
兼置右
民郎曹

魏主戒嚴北討不果行

書法

凡征討書不果譏也綱目書不果行十有一而於征討救書之者五丁未年魏主再書唐

嗣聖五年武氏上元元年肅宗五代

辛亥年周主惟武氏及周主非譏辭

○莫折天生寇雍州敗死衆潰

天生寇雍州蕭實寅部將羊侃
隱身塹中射殺之其衆遂潰

梁侵魏圍東豫州及琅邪克三關○魏以房景伯為東

清河太守

魏東清河郡山賊羣起詔以房景伯為太守郡民劉簡虎嘗無禮於景伯舉家亡去景伯擒之署其子為掾令諭山賊賊以景伯不念舊惡相帥出降景伯母崔氏通經有明識貝丘婦人列其子不孝景伯白其母母曰民未知禮義何足深責乃召其母與之對榻共食使其子侍立堂下觀景伯供食未旬日悔過求還崔氏曰此雖面慙其心未也且置之凡二十餘日其子叩頭流血母涕泣乞還然後聽之卒以孝聞胡氏曰民固多愚然其良心終不忘也為人上者不知教化何以善民而專尚刑法見其不服也則謂民頑愈益治之民愈扞格甚者視如寇讐焉崔母一婦人而知教化之原不繫詞令而在於躬率教化之効不

取革面而在於心改旬月之間變頑悖為孝子孰謂民果頑哉為人上而觀此亦可省已而脩德矣質

實

貝丘按一統志南宋之縣名為東清河郡治所北齊罷郡以縣屬齊州隋置淄州改貝丘為淄川縣

唐宋金俱因之元初改淄州為淄萊路後改般陽路以縣為倚郭焉本朝初改路為淄川州以縣省入尋又改州為縣屬濟南府

書法

魏自辛未書以王慧龍為滎陽太守至是九十餘年矣於是始書景伯是時郡守惟景伯

庶乎以德為政者故書嘉之

二月莫折念生據潼關質實

潼關按一統志在西安府華陰縣東四十里

○

梁攻彭城魏人擊却之考異

攻字下漏魏字

○三月魏主戒嚴

西討不果行

發明

魏自諸鎮之叛寇盜蜂起綱目不勝其書其間師徒潰散督將陷沒不知其幾中外知其

將亡而魏主晏然不恤是歲始有戒嚴之命而亦終於不行亦徒為是虛聲而已彼拓跋珪以來四方攻伐皆身親之用能恢拓疆宇雄據中夏今日蹙百里而其主安於淫侈嬖倖盈朝雖門庭之寇亦弗暇討綱目兩書于冊一則曰戒嚴北討不果行一則曰戒嚴西討不果行皆以著其怠於禦寇之實然則魏之亡也非盜賊能亡之也魏自亡爾

○梁主捨身於同泰寺質實

同泰寺按一統志在應天府城中臺城內

書法

直書其事不待貶而義見矣書捨身始此終綱目書捨身四梁武帝陳高祖四梁武帝凡

三書馬陳叔寶捨身不書
大建壬寅不於寺故畧之

發明

甚哉梁武之愚也人生天地間有此生則有此身生不可減則身不可捨抑不知梁武之

所謂捨者以何為捨爾若以屏富貴棄妻子為捨耶則是身捨物而非曰捨身也若以委其身於佛氏為捨耶則為佛者當取其身而用之可也今既曰捨而其身猶在則是初未嘗捨也身未嘗捨而強名曰捨則固已昧其心於不誠矣他時諸臣又以金而贖其身不知當其捨之時孰從而受之而贖之時又孰從而歸之也梁主身非賣僮而可捨可贖此不惟愚誑其民愚誑其身抑且愚誑其所謂佛矣末年荷荷之時又復戀戀而不能捨何哉孟子有言舍魚而取熊掌舍生而取義夫魚熊掌二物也固可捨其一而取其一若捨生取義則必殺身殉義而後可萬一其生猶在則亦不謂

之捨矣綱目於梁主捨身之事屢書于冊若無貶詞然以一國之君而欲捨其身則宗廟社稷之重土地人民之託誰實尸之况又實未嘗捨乎其貶之之意明矣梁武溺佛之禍先儒論之甚詳臣姑因綱目所書而取其捨身之一說極論其所以妄云

○夏四月魏復以蕭寶寅為西討大都督

寶寅之敗也免為庶人至是楊椿有疾求解復以寶寅代之椿子昱將適洛陽椿謂之曰當今雍州無踰寶寅者但其上佐朝廷應遣心膂重人何得任其牒用且寶寅不藉刺史為榮吾觀其得州喜甚至於賞罰云為不依常憲恐有異心汝當以此意啓二聖并白宰輔更遣長史司馬防城都督欲安關中正須三人耳不然必成深憂

集覽

上佐別駕從事是也此當朝廷遣心膂重臣為之何

得任其牒用謂豈可任從
寶寅擅以文牒自置上佐

書法

書復以何譏貳過也涇州之敗嘗免為庶人
矣於是復用寶寅竟殺鄴道元而反故書譏

之

秋七月魏陳郡亂討平之

魏陳郡民劉獲鄭辯反於西華與梁譙州刺史湛僧
智通謀魏以曹世表為東南道行臺以討之諸將以
賊彊不敢戰世表方病舉出呼統軍是云寶謂曰湛
僧智敢深入者以獲辯州民之望為之內應也聞獲
引兵迎僧智去此八十里今出其不意一戰可破獲
破僧智自走矣乃選士馬付寶擊獲等大破殺之僧
智聞之
遁還

集覽

是云寶是云蕃
複姓寶名也

質實

陳郡按一統志後
魏所置治陳縣隋

廢之唐置陳州於此五代晉改為鎮安州周改州為軍宋初陞為淮寧府金元復為陳州本朝因之改屬開封府燕州三國魏所置治譙縣後周改為亳州唐初復為譙州後復為亳州宋置集慶軍金仍為亳州元改屬歸德府本朝初降為縣改屬鳳陽府而華漢之縣名屬汝南郡晉省之宋復置隋改為鴻溝縣屬淮陽郡唐初改為其城縣後復為西華宋屬淮寧府金屬陳州元仍其舊本朝因之改屬開封府

魏樂安王鑒以鄴叛降葛榮○魏李神軌殺高謙之

初魏侍御史高道穆奉使相州按前刺史李世哲奢縱不法至是世哲弟神軌用事道穆兄謙之家奴訴良神軌收謙之繫廷尉會赦將出神軌啓太后先賜謙之死朝士哀之

書法

謙之為奴所告死耳罪神軌何復怨也於是神軌得幸太后先赦殺之書神軌所以病太

也 后

梁將彭羣圍魏琅邪敗死○八月魏大都督源子邕拔
鄴城誅元鑒○九月秦州人殺莫折念生以州降魏○
冬十月梁將湛僧智夏侯夔圍魏廣陵克之

湛僧智圍魏東豫州刺史元慶和於廣陵魏將軍元
顯伯救之梁司州刺史夏侯夔引兵助僧智慶和舉
城降夔以讓僧智僧智曰慶和欲降公僧智今往必
乖其意且僧智所將應募烏合之人不可御以法公
持軍素嚴必無侵暴受降納附深得其宜夔乃登城
拔魏幟建梁幟慶和束兵而出吏民安堵顯伯宵遁
梁軍追之斬獲萬計梁主以僧智鎮廣陵夔屯安陽
遣別將屠楚城由是義陽通道遂與魏絕司馬公曰

僧智忘其積時攻戰之勞以授一朝新至之將知已之短不掩人之長功成不取以濟國事忠且無私可謂君質實東豫州按一統志後魏所置治新息縣梁改曰西豫州又改曰淮州東魏復曰東豫子矣州後周改息州隋廢唐復置貞觀初廢以縣屬蔡州金復置息州元屬汝寧府至本朝降為縣仍屬汝寧府

書法

於是夔助之攻城降于夔則夔功也並書二將何僧智讓也故嘉之是故鍾離之勝景宗

與韋廠並書廣陵之克僧智與夏侯並書皆嘉其讓也

梁將陳慶之攻魏渦陽克之

梁領軍曹仲宗直閣陳慶之攻魏渦陽尋陽太守韋放將兵會之魏兵奄至放營未立麾下繞二百人放

免胄下馬據胡牀處分士皆殊死戰莫不一當百魏兵遂退放獻之子也魏又遣將軍元昭等帥衆五萬救渦陽前軍未至四十里慶之欲逆戰放曰前鋒必輕銳不如勿擊待其來至慶之曰魏兵遠來疲倦去我尚遠必不見疑宜及其未集挫之乃帥麾下進擊破之還與諸將連營而進背渦陽城與魏軍相持自春至冬數十百戰將士疲弊間魏欲築壘於軍後曹仲宗等恐議引還慶之杖節軍門曰吾聞置兵死地乃可求生須敵大合然後與戰審欲班師慶之別有密敕犯者行之乃止魏作十三城欲以控制梁軍慶之銜枚夜出陷四城渦陽城主王緯乞降韋放簡遣降者三十餘人分報魏諸營陳慶之陳其俘馘鼓譟隨之九城皆潰追擊之

集覽

俘馘左傳僖二十八年獻俘授馘注俘軍所獲

俘斬略盡尸咽渦水

囚也馘軍戰所截左耳也獻謂獻之於廟也授數也

書法

於是曹仲宗與慶之共攻克之則其獨書慶之何仲宗怯也是故沈田子傳弘之俱入武

關者也弘之怯不書而書田子陳慶之曹仲宗共克洛陽者也仲宗怯不書而書慶之綱目之於功罪審矣其為勸戒明矣

魏蕭寶寅殺關右大使酈道元舉兵反魏遣行臺長孫稚討之

蕭寶寅之敗於涇也或勸之歸罪洛陽或曰不若留關中立功自効寶寅自念出師累年糜費不貲一旦覆敗內不自安魏主亦疑之中尉酈道元性嚴猛汝南王悅嬖人弄權道元殺之并効悅時寶寅反狀已露悅乃奏以道元為關右大使寶寅聞之謂為取已甚懼長安輕薄子弟復勸使舉兵寶寅以問河東柳

楷楷曰謠言驚生十子九子懈一子不懈關中亂亂治也大王當治關中何所疑寶寅遂遣將攻殺道元行臺郎中蘇湛以病卧家寶寅令其妹弟姜儉說之曰道元之來事不可測吾不能坐受死亡不復作魏臣矣生死榮辱與卿共之湛入哭曰王本以窮鳥投人朝廷假王羽翼以至於此屬國步多虞不能竭忠報德乃欲乘人間隙守關問鼎魏德雖衰天命未改湛不能以百口為王族減願賜骸骨歸鄉里庶得病死下見先人寶寅素重湛且知其不為已用聽還武功遂自稱齊帝改元置百官長史毛遐與弟鴻賓帥氐羌起兵拒之魏以長孫稚為行臺討寶寅正平民薛鳳賢薛脩義亦聚眾河東據鹽池圍蒲阪東西連結以應寶寅詔都督宗正珍孫討之胡氏曰寶寅奔魏之心本欲假其兵力為宗國復讐似也則宜不離淮漢之北伺間南伐死而後已若夫成功則天也冀雍二州豈梁所在邪而為之刺史雖曰不利人不信

矣以義始以利終不至於作亂受戮則無能靖之道此小人之本末也

集覽

嘏徒玩反說文卯不

孚也廣韻注卯壞也楊子曰雌之不才其卯嘏矣國步多虞時運也謂國運多有可虞慮之事詩桑柔篇國步斯頻問鼎左傳楚子伐陸渾之戎遂至于洛觀兵于周疆定王使王孫滿勞楚子楚子問鼎大小輕重對曰在德不在鼎桀有昏德鼎遷于殷載祀六百殷紂暴虐鼎遷于周德之休明雖小必重其姦回昏亂雖大必輕昔成王定鼎于郊鄒卜世三十卜年七百年所命也周德雖衰天命未改鼎之輕重未可問也又九鼎注見周慎靚王五年武功注見漢後主建興十二年宗正複姓漢楚元王交之孫劉德為宗正其支孫因以為氏焉

發明

拓跋失御反者如蝟毛而起自鎮兵山胡羣蠻與夫諸郡之民莫不相延而動甚至寵臣

如法僧宗臣如元鑒輩亦皆反叛相屬綱目悉書
于冊今竇寅以羈旅寄食逃竄之臣且復稱兵造
亂寇盜如此魏氏烏得不亡然竇寅始欲為宗國
復讐而終於作亂亡滅信知讐固未易復而義亦
未易舉也綱目於是年書竇寅反於後三年書竇
寅誅不特著小人反覆交亂之禍亦以為招納叛
亡者之鑒爾蕭鸞僅有一息自
取殄絕天之所廢其可興乎

十一月梁以蕭淵藻為北討都督鎮渦陽質寶

渦陽按一統志

元魏之縣名屬譙郡隋改曰淝水縣大業中改為山桑縣唐改蒙城縣五代宋因之金屬壽州元改屬安豐路本朝因之改屬鳳陽府
○葛榮陷魏冀州殺都督源子邕裴衍遂

寇相州不克

葛榮圍信都自春至冬冀州刺史元孚帥勵將士晝夜拒守糧儲既竭外無救援城陷與兄祐俱執榮大集將士議其生死孚兄弟爭相為死都督潘紹等數百人皆叩頭請死以活使君榮曰此皆魏之忠臣義士也皆免之魏命源子邕討榮裴衍表請同行許之子邕言衍行臣請留臣行請留衍若必同行敗在旦夕不許行至漳水榮擊之果敗俱死相州間冀州陷人不自保刺史李神志氣自若撫勉將士大小致力榮盡銳攻之卒不能克也

戊辰大通二年魏孝昌四敬
申宗孝莊帝子攸永安元年

考異

分注孝昌四
當作武泰元

春正月

杜洛周陷魏定州執行臺楊津遂陷瀛州

魏復以楊津為北道行臺守定州居鮮于脩禮杜洛周之間迭來攻圍津蓄薪糧治器械隨機拒擊使人

潛說賊黨賊黨有應津者遺津書曰所以圍城正為取北人耳宜盡殺之不然必有患津悉收北人內于城中而不殺衆感其仁及葛榮統衆使人說津津斬其使固守三年洛周圍之魏不能救長史李裔引賊入執津瀛州刺史元寧以城降賊

魏大赦考證

下當書境內

魏潘嬪生女胡太后
詐言皇子大赦改元

書法

魏赦未有書者此何以書譏也於是潘嬪生女太后詐言皇子大赦改元赦之無義謂莫

甚於此故
特書譏之

魏長孫稚討蕭寶寅敗之寶寅奔万俟醜奴

實寅圖馮翊長孫稚軍至恒農左丞楊侃謂稚曰潼關險要守禦已固不如北取蒲坂渡河而西入其腹心置兵死地則華川之圍不戰自解潼關之守必內顧而走支節既解長安可坐取也稚曰子之計則善矣然今薛脩義圍河東薛鳳賢據安邑宗正珍孫守虞坂不得進如何可往侃曰珍孫行陳一夫可為人使安能使人河東治蒲坂西逼河封疆多在郡東脩義驅民西圍郡城其家皆留舊村一旦聞官軍至皆有內顧之心必望風自潰矣稚乃使其子彥與侃帥兵北渡據石錐壁命送降名者各還村俟臺軍舉三烽當亦舉烽相應無應烽者乃賊黨也當進擊屠之以所獲賞軍於是村民轉相告語雖實未降者亦詐舉烽一宿之間火光遍數百里賊圍城者不則各散歸脩義鳳賢俱請降稚遂克潼關會有詔廢鹽池稅稚上表曰臣前違嚴旨徑解河東非緩長安而急蒲坂誠以一失鹽池則三軍乏食也畧論鹽稅一年準

絹三十萬匹昔高祖昇平之年猶創鹽官加典護非
與物競利恐由利亂俗也况今國用不足徵六年之
粟折來歲之資此皆奪人私財事不獲已豈若實天
產之貨而均贍以理乎臣已輒符所部依常收稅蕭
實寅將侯終德因其敗襲
質實虞坂按一統志在平陽府蒲州東南一十五里中條山春秋晉荀息請以屈產之乘垂棘之璧假道於虞以伐虢即此伯樂逢驥驥困鹽車亦此地俗名青石槽金元好問有虞坂行鹽池在平陽府解州產鹽又安邑縣亦有池生乳鹽唐大厯中賜名實應慶
靈池

葛榮殺杜洛周并其衆○魏太后胡氏進毒弑其主詡
而立臨洮王世子釗

太后再臨朝以來嬖倖用事政事縱弛盜賊蠭起封疆日蹙魏主年浸長太后自以所為不謹凡魏主所愛信者輒以事去之務為壅蔽不使知外事由是母子之間嫌隙日深是時車騎將軍六州大都督爾朱榮兵彊劉貴段榮尉景蔡雋皆歸之貴屢薦高歡於榮榮見其憔悴未之奇也廐有悍馬命歡剪之歡不加羈絆而剪之竟不蹄齧起謂榮曰御惡人亦由是矣榮奇其言坐之牀下屏左右訪以時事歡曰聞公有馬十二谷色別為羣畜此竟何用也榮曰但言爾意歡曰今天子闇弱太后淫亂嬖孽擅命朝政不行以明公雄武乘時奮發討鄭儼徐統之罪以清帝側霸業可舉鞭而成此賀六渾之意也榮大悅自是每參軍謀胡氏曰魏之中葉以門地取士及其衰也以停年用人於是英雄散逸才智不用思有以振而發之而天下始多故矣向使魏朝收而用之二百年之基業豈易傾乎○并州刺史元天穆與榮善榮兄事

之常與天穆及賀拔岳密謀舉兵入洛內誅嬖倖外
清羣盜二人皆勸成之表請不聽遂舉兵塞井陘魏
主亦惡儼紇等逼於太后不能去密詔榮舉兵內向
欲以脇太后榮以高歡為前鋒至上黨魏主復以私
詔止之儼紇恐禍及已陰與太后謀酖魏主殺之偽
立皇子為帝既而下詔曰潘嬪所生實皇女也臨洮
世子釗高祖之孫可立遂迎釗即位生三年矣太后
欲久專政故立之爾朱榮聞之大怒謂元天穆曰吾
欲起哀山陵剪誅姦佞更立長君何如天穆曰如此
則伊霍復見於今矣乃抗表曰大行皇帝背棄萬方
海內咸稱酖毒致禍又立皇女虛行赦宥上欺天地
下惑朝野已乃選君於孩提之中實使姦豎專朝隳
亂綱紀今羣盜沸騰鄰敵窺窬而欲以未言之兒鎮
安天下不亦難乎願聽臣赴闕參預大議問侍臣帝
崩之由訪禁衛不知之狀以徐鄭之徒付之司敗雪
同天之恥謝遠近之怨然後更擇宗親以承寶祚胡

氏曰魏氏之亂始於世宗奉佛政事不脩重以肅宗
幼弱胡后稱制穢德彰聞元澄雍懌才薄力弱劉騰
元叉擅權黷貨以召六鎮之兵雖然其間非無忠謀
至計排難解紛者而朝廷忽焉如元匡崔光弼翻李
崇張普惠薛淑元孚元深元順元纂辛雄路思合楊
椿源子邕之言皆不聽也然則非爾朱榮高歡能為
魏毒也魏
自亡爾
集覽有馬十二谷漢貨殖傳烏氏保者始
皇時人畜牧極衆斥賣求奇繒物因
間私獻戎王戎王什倍其償與之畜畜至用谷量馬
牛韋昭曰滿谷則具不復數也索隱曰言數饒不可
計算故以山谷多少言之賀六渾高歡自稱其小字
賀拔岳賀拔蕃複姓也岳其名也大行皇帝注見漢
昭帝元
平元年

書法

其子也書弑何尊無二上也於是誅立十四
年矣非大無道太后安得毒而殺之綱目於

其生也正其名曰魏主之子於其死也書其主而正其罪曰弑所以尊先君重社稷且以明無二上之義也豈其曰已子而可以率意殺之哉終綱目書婦人行弑者六詳宋丙辰而書太后弑者二魏

馮氏

胡氏

發明

凡人之動於惡雖或迫於事變亦必有所則而為之魏自孝文不能正文成馮氏之罪故

其後淫亂相踵觀胡氏之所以濁亂魏國者大類馮氏惟馮氏得志於前故胡氏効尤於後第馮氏挾智數以御物又適其時拓跋方盛故不見其敗亡之禍至胡氏則不免矣武后亂唐死於牖下於是不能旋踵而有韋庶人之逆是皆胡氏之類也綱目前書魏太后馮氏弑其主此書魏太后胡氏進毒弑其主後之處事變者觀之可不明大義而絕禍源哉

三月葛榮陷魏滄州質寶

滄州按一統志後魏之州名治浮陽縣隋為勃海郡治清

池縣唐改滄州天寶初改景城郡乾元初復為滄州唐末置義昌軍五代梁改順化軍唐改橫海軍宋因之金陞為臨海軍屬河北東路元改隸河間路至本朝仍為滄州以清池縣省入改屬河間府 ○魏爾朱

榮舉兵晉陽夏四月至河陽立長樂王子攸而沈太后

胡氏及幼主釗于河殺王公以下二千人自為都督中

外諸軍事封太原王遂入洛陽考異

提要此條自字下作魏主以榮都督

中外諸

軍事

爾朱榮與元天穆議以彭城武宣王有忠勲其子長樂王子攸素有令望欲立之遣從子天光告之子攸

許之榮以銅為顯祖諸子孫各鑄像唯子攸像成榮乃起兵發晉陽靈太后聞之懼悉召王公等入議宗室大臣疾太后所為皆莫肯言太后乃用徐紇計遣李神軌帥衆拒之別將鄭先護鄭季明守河橋四月子攸潛自高渚渡河會榮於河陽濟河即位以榮為都督中外諸軍事封太原王先護季明開城納之將軍費穆亦降徐紇鄭儼皆亡走太后落髮出家榮召百官奉璽綬備法駕迎於河橋遣騎執太后及幼主至河陰沈之河費穆密說榮曰公士馬不出萬人長驅向洛以京師之衆百官之盛知公虛實有輕侮心若不大行誅罰更樹親黨恐今還北之日未度太行而內變作矣榮心然之謂所親慕容紹宗曰洛中人士終難制馭欲悉誅之何如紹宗曰明公興義兵以清朝廷今乃無故殲夷多士失天下望非長策也榮不聽至陶渚引百官集於行宮西北列蕃騎圍之責以天下喪亂肅宗暴崩朝臣貪虐不能匡弼之罪因

縱兵殺之自丞相高陽王雍司空元欽儀同三司元
畧以下死者二千餘人胡氏曰胡后魏之罪人榮之
沈之當矣幼主何罪而并殺之邪魏之諸臣亦信有
罪矣然非可盡責也榮能誅其姦慝而擢其賢才則
五伯之功立矣乃恃其威力肆行誅殺其不仁亦甚
哉雖然仕于昏亂之朝懷寵耽利者亦可以少戒哉
○榮乃令其軍士言元氏既滅爾朱氏興皆稱萬歲
榮又遣數十人拔刀向行宮殺魏主之兄無上王劭
弟始平王子正遷魏主於河橋置之幕下魏主憂憤
使人諭榮曰帝王迭興盛衰無常今四方瓦解將軍
奮袂而起所向無前此天意非人力也宜以此時早
正尊號若欲存魏社稷亦當更擇親賢而輔之時高
歡勸榮稱帝左右多同之賀拔岳進曰將軍首舉義
兵志除姦逆大勲未立遽有此謀正可速禍未見其
福榮乃自鑄金為像凡四鑄不成命參軍劉靈助卜
之亦曰未可榮亦精神恍惚不自支持久而方悟深

自悔曰唯當以死謝朝廷岳請殺歡以謝天下左右以四方多事須藉武將請捨之乃止榮夜復迎魏主還營叩頭請死榮所從蕃騎殺朝士既多不敢入洛榮乃議欲遷都其將汎禮固諫乃奉魏主入城大赦時百官蕩盡唯散騎常侍山偉一人拜赦洛中士民逃竄直衛空虛官守曠廢榮乃遣使巡城勞問於是朝士稍出人心粗安封劭之子韶為彭城王榮猶執遷都議都官尚書元譔爭之榮怒曰河陰之役君應知之譔曰天下事當與天下論之奈何以河陰之酷恐元譔乎譔國之宗室位居常伯正使今日碎首流腸亦無所懼榮大怒欲抵譔罪譔顏色自若乃捨之後數日榮與魏主登高見宮闕壯麗列樹成行乃歎曰元尚書之言不可奪也由是罷議榮因入見重謝河橋之事誓言無復二心魏主亦為榮誓言無疑心榮喜求酒飲之熟寐魏主欲誅之左右不可乃止榮夜半方寤自是不復宿禁中矣榮舉止輕脫喜馳射

性嚴暴喜愠無恒
左右恒有死憂

集覽

鑄像注見晉安帝隆安四年
鑄金人河橋杜預曰造舟為

梁則河橋之謂也汎禮汎姓

質實

河橋按一統志在
河南府孟津縣晉

注見漢桓帝建和元年汎宮

杜預以孟津渡險請建河橋於富平津議者難之預

曰造舟為梁則河橋之謂也卒成之河陰漢之縣名

屬河南郡晉魏因之唐開元初仍屬河南郡會昌初

改屬孟州宋以汜水縣省入金屬鄭州元仍其舊本

朝改屬

開封府

書法

反也不書反書舉兵何正太后之為賊也然
至於沈幼主殺王公二千人則榮亦賊矣書

曰遂入洛陽入惡辭也然則釗太后所立也其
成之為幼主何成之為幼主所以正罪榮也

發明

榮不書反者討有罪也然書舉兵而不書討
何哉榮本懷謀利之心假大義以問罪非真

有討賊之意也胡氏有罪而不書誅者不予榮之誅也諸臣不為無罪而書殺者惡榮之濫及無辜也魏自宣武以來政事日舛重以肅宗繼之姦倖盈朝覆轍相踵不至於大壞極弊而不止觀綱目之所書考魏氏之顛末有國家者可以鑒矣

魏徐紇奔泰山鄭儼伏誅

儼與從兄滎陽太守仲明謀據郡起兵為部下所殺

書法

儼為部下所殺耳書伏誅何罪宜誅也

魏汝南王悅臨淮王彧北海王顥出奔梁○魏郢青南
荊州皆叛附于梁○五月魏立肅宗嬪爾朱氏為后

榮女先為肅宗嬪榮欲魏主納以為后魏主疑之黃
門侍郎祖瑩曰昔文公在秦懷嬴入侍事有反經合
義陛下獨何疑焉遂從之榮甚悅胡氏曰反經合道
先儒釋經之言而道之蠹也反猶背也經即常也既
已背常能合道乎此言既行世之違犯正理者輒以
自解其賊道多矣或曰如舜不告禹傳子湯放桀武
王誅紂周公殺管叔仲尼出妻若此者非反經乎曰
此聖人處事之變是之謂權權者猶衡之石焉進退
前卻與所懸之物輕重適等故雖權也而輕者不使
之重重者不使之輕乃所以為經也故權者道之中
處也濟經而有權則道之用不窮非聖人不能與豈
變詐亂倫之謂哉祖瑩之言違道甚矣晉文之失又
何效焉正家者治國之本初政者治亂之源魏子攸
惑於邪說而不能辨惕於強臣而不能正早墜厥命
於是乎集覽懷嬴入侍左傳僖十七年晉太子圉質
在矣秦秦以嬴氏妻之二十一年子圉逃

歸是為懷公故嬴氏號懷嬴二十三年晉公子重耳奔秦秦伯納女五人懷嬴與焉案懷嬴重耳之姪婦也舜不告孟子萬章篇舜之不告而娶趙氏註云禮娶須五禮父母先答以辭是相告也程子曰舜不告而娶固不可堯命瞽瞍使舜娶舜雖不告堯固告之爾堯之告也以君治之而已

書法

肅宗何魏主其叔也立后書氏恒也書曰立肅宗嬪醜之甚矣然則其不斥魏主何兼罪

榮與其臣也立后亂倫綱目必謹書之是故魏書肅宗嬪唐書太宗才人閔再書父婢晉書叔母皆

深醜之也

發明

叔末之君受制強臣鮮有能自全者惟處身以禮以聽天命之去留則或庶幾焉爾朱氏

既嬪于肅宗今長樂又迫於榮而立之苟能以禮自守縱使終於不免要亦得正而斃不至亂男女

之別也況立后所以承宗廟正母儀又烏可以懷
羸為比乎直書立肅宗嬪爾朱氏為后其惡曉然
具見於
綱目矣

爾朱榮還晉陽以元天穆為侍中錄尚書事兼領軍將
軍

榮令元天穆入洛陽朝廷
要官悉用其腹心為之

書法

榮嘗自封太原王矣不書太原王榮何據高
歡自為丞相書丞相歡削之也榮沈幼主殺

王公則賊也故削之而終榮之身不書爵然則曷
為不書魏去魏所以見天穆之為侍中榮以之也

魏主聽訟于華林園質實

華林園按一統志在河南府
城東北隅魏明帝所建齊王

芳改為
華林園

詔孝昌以來凡有冤抑無訴
者悉集華林東門親理之

魏詔聽民入粟

時承喪亂之後倉廩虛竭始詔入粟八
千石者賜爵散侯五百石者賜出身

梁遣將軍曹義宗圍魏荊州

義宗圍魏荊州堰水灌城不沒者數版時魏方多難
不能救城中糧盡刺史王羆煮粥與將士均食每出
戰不擐甲胄仰天大呼曰州城孝文皇帝所置天若不
祐國家令箭中王羆額不爾王羆必當破賊彌歷
三年前後搏戰
甚衆亦不被傷

六月元或自梁歸于魏

或聞魏主定位求還梁主
惜其才而不能違遣之

書法

凡奔書歸善辭也猶有
宗國之心焉故善之

魏免其侍郎高乾高昂官考異

提要作魏侍郎
高乾高昂免

魏高乾與弟教曹季式皆喜輕俠與魏主有舊爾朱
榮之向洛也逃奔齊州間河陰之亂遂集流民起兵
於河濟之間頻破州軍至是乃降魏主以乾及教曹
皆為侍郎爾朱榮以乾兄弟前為叛亂不應復居近
要魏主乃聽解官歸教曹復抄
掠榮誘執之教曹名昂以字行

魏河間邢杲反○万俟醜奴稱帝○秋八月魏泰山太

守羊侃據郡降梁

侃以其祖規嘗仕宋常有南歸之志徐紇依之勸侃起兵遣使降梁

九月葛榮圍魏相州爾朱榮討擒之冀定滄瀛殷皆平

葛榮引兵圍鄴衆號百萬爾朱榮帥精騎七千馬皆有副倍道兼行東出滏口以侯景為前驅葛榮曰此易與耳自鄴以北列陳數十里其張而進爾朱榮潛軍山谷為奇兵分督將已上三人為一處處有數百騎揚塵鼓譟使賊不測多少又以人馬逼戰刀不如棒勒軍士各置袖棒一枚置馬側至戰時慮廢騰逐不聽斬級以棒棒之而已分命壯勇所向衝突號令嚴明戰士同奮身自陷陳出於賊後表裏合擊大破之擒葛榮餘衆悉降縱其所之羣情大喜數十萬衆一朝盡散待出百里之外乃始分道押領隨便安置

擢其渠帥量才授任檻車送葛榮赴洛斬之五州皆
平初宇文肱從鮮于脩禮戰死其子泰從葛榮至是
爾朱榮愛其

集覽

滄口注見晉考武帝太元十九年
箕張正義曰箕張猶春秋魚麗陣

才以為統軍也左傳鄭伯使原繁高渠彌以中軍奉公為魚麗之
陣注云其法先偏後伍伍承彌縫此魚麗陣法也杜
預曰車陣二十五乘為偏步卒五人為伍蓋以車當
前以伍次之謂以伍乘偏之隙而彌縫其缺漏也麗
音離奇兵注見唐憲宗元

正誤

箕張而進今按
如箕之張也

質實

和十二年兵非出奇不勝
滄口滄水之口也按一統志源出彰德府磁州西北
神農山湧沸如湯出釜故名東流至臨漳縣界入漳
河

魏爾朱榮自為大丞相○冬十月梁立元顥為魏王遣

將軍陳慶之將兵納之考異

提要此條下有據鉅城三字

發明

拓跋雖亂然長樂已正尊位是其國未嘗無君也梁主乃立元顓又遣兵送之何義哉書

遣將軍將兵納之納者不順之詞如春秋書莊公伐齊納糾之類若曰彼不受而此強以兵納之謂也書法如此可以觀矣

○魏遣將軍費穆救荊州獲曹義宗○十一月魏復取泰山郡羊侃徐紇奔梁

魏遣兵擊羊侃於瑕丘徐紇說侃乞師於梁侃信之紇遂奔梁魏圍益急南軍不進侃亦潰圍奔梁魏復取泰山胡氏曰弒君天下之大惡人人之所同惡人人之所得殺也徐紇親弒其君為梁計者聲言其罪

肆諸市朝則君臣之義明近者畏而遠人悅矣乃受而容之是教人為弑逆而無所懼也他日困於叛臣卒餓而死其禍有自來矣

十二月魏幽州韓樓反

葛榮餘黨韓樓復據幽州反北邊被其患爾朱榮以賀拔勝鎮中山樓畏勝不敢南出

己梁中大通元年
酉魏永安二年

春正月魏主追尊其父勰為皇帝

魏主尊彭城武宣王為文穆皇帝廟號肅祖將遷神主於太廟而以高祖為伯考臨淮王彧諫曰漢光武於元帝屬疎服絕猶身奉子道入繼大宗別祀南頓君於舂陵况肅祖於高祖親北面為臣乎二后皆將配享此為君臣竝筵嫂叔同室臣切以為不可不聽請去帝著皇亦不聽尋復尊無上王劭帝號彧又諫

亦不聽
集覽

南頓君漢光武父封於南頓南頓注見光武建武十九年

書法

哀帝追尊其父未論禮之當否於是直稱文穆皇帝甚矣綱目不書文穆譏在於皇帝不

在於文穆也

發明

魏主追尊其父未論禮之當否是時國祚危甚綴旒戎馬在郊強臣擅命寇盜充斥魏主

居可畏之地身之不保榮於何有乃欲追榮其父多見其不知量也且帝者有天下之稱總終身北面不得其死祖宗昭穆若何入廟魏主皆不此之思况爾朱方以扶立示功正使推而弗居猶懼不免烏在以位為樂而欲舉非禮之禮上榮其考哉直書于冊繆可知矣

夏四月魏王顥拔榮城稱皇帝集覽

榮城即榮陽城也注見秦莊襄王元

年

魏元天穆將擊邢杲以顓北上乃集文武議之皆曰
杲衆強盛宜以爲先尚書薛琚曰邢杲鼠竊狗偷非
有遠志顓帝室近親來稱義舉其勢難測宜先去之
天穆不聽引兵東出顓與陳慶之乘虛進拔榮城有
衆七千遂即帝位於睢陽城南攻集覽考城注見漢
魏行臺濟陰王暉業於考城擒之桓帝延熹十
年

書法

不書自立書稱何不予顓之自稱也社稷有
主而仗讐國以伐其宗是爭也故綱目終顓

之身稱

魏王

魏元天穆討邢杲平之○五月魏王顓取梁國滎陽虎

牢考異

提要王作主

顓克梁國魏都督楊昱據滎陽陳慶之攻之未拔元
天穆等至梁士卒皆恐慶之解鞍秣馬諭將士曰君
等殺人父兄掠人子女多矣天穆之衆皆仇讐也然
我衆纔七千敵三十餘萬今日唯有必死乃可得生
當及其未盡至急取其城而據之耳乃鼓之將士蟻
附而入執楊昱諸將請殺之顓曰我聞梁主數稱袁
昂之忠今奈何殺昱乎俄而天穆等集覽梁國注見
引兵圍城慶之力戰破之進拔虎牢周顯王三
十九年大梁袁昂之忠言楊昱之不降魏猶袁
昂之不降梁也袁昂事在齊和帝中興元年

魏主子攸奔河內顓入洛陽以陳慶之為車騎大將軍

魏主子攸將出未知所之或勸之長安中書舍人高
道穆曰關中荒殘何可復往顓兵不多乘虛深入陞

下若親帥宿衛背城一戰臣等竭其死力破顓必矣或恐勝負難期則車駕不若渡河徵天穆及榮引兵進討此萬全之策也子攸遂走河內臨淮王或安豐王延明帥百僚迎魏王顓顓入洛陽以慶之為車騎大將軍楊椿時在洛陽顓意忌之以其人望未敢誅也或勸椿出亡椿曰吾何所逃正當坐待天命耳元天穆拔大梁顓使慶之擊之天穆將北走郎中溫子昇曰顓新入人情未安擊之必克平定京邑奉迎大駕桓文之舉也捨此北渡竊為大王惜之天穆不能用費穆攻虎牢將拔聞天穆走遂降慶之進擊大梁下之慶之以數千之衆自發鉅縣至洛陽凡取三十城四十七戰所向皆克顓命黃門郎祖瑩作書遺子攸曰朕泣請梁朝誓在復恥正欲問罪於爾朱出卿於虎口耳河南州郡多附於顓齊州刺史沛郡王欣集文武議所從軍司崔光韶抗言曰元顓受制於梁引寇讐之兵以覆宗國此魏之賊臣亂子也豈唯

大王家事所宜切齒下官等皆荷朝集覽鉅縣屬譙郡案譙郡

今亳州是鉅縣按一統志漢之所置屬沛郡晉

鉅之日反質實改屬譙郡梁改為臨渙縣隋廢之故

址在鳳陽府宿州西南九十里

書法

名子攸何失國也

發明

子攸何以名失地之君也况是時顓既稱帝若直書魏主則不知其孰為顓孰為子攸故

名以別之爾不如是何以為綱目

六月魏都督費穆伏誅

穆至洛陽魏主顓責以河陰之事而殺之

書法

誅穆者顓也不成顓之為帝則曷為以誅書河陰之役穆助榮為虐是亦賊而已矣逆賊

人得而誅之

魏湖陽叛降于梁○閏月魏爾朱榮渡河魏王顓走死

陳慶之走歸梁魏主子攸歸洛陽榮自為天柱大將軍

考異

提要王竝作主據上書顓稱皇帝則當書魏主顓

魏主子攸之出也單騎而去侍衛後宮按堵如故顓一旦得之號令已出四方想其風政而顓遽驕怠近

習干政日夜縱酒不恤軍國所從南兵陵暴市里朝野失望高子儒自洛陽出從子攸子攸問之子儒曰顓敗在旦夕不足憂也爾朱榮馳見子攸於長子子攸即日南還榮為前驅旬日之間兵衆大集顓既得

志與臨淮王或安豐王延明謀叛梁以事難未平藉
陳慶之兵力故外同內異言多猜忌慶之亦密為之
備說顥曰今遠來至此未服者尚多彼若知吾虛實
連兵四合將何以禦之宜更請兵於梁顥欲從之延
明曰慶之兵已難制今更增其衆寧肯復為人用乎
大權一去動息由人魏之宗廟於斯墜矣顥乃不用
慶之言軍副馬佛念謂慶之曰將軍功高勢重為魏
所疑一日變生不測可無慮乎不若乘其無備殺顥
據洛此千載一時也慶之不從顥先以慶之為徐州
刺史慶之固求之鎮顥心憚之不遣爾朱榮兵至慶
之守北中城顥據南岸慶之三日十一戰殺傷甚衆
有夏州義士為顥守河中渚與榮通謀求破橋立效
及橋破而榮兵不至顥悉屠之榮既失望又以無船
議還北圖後舉黃門郎楊侃曰大王發并州之日已
知夏州義士之謀指來應之邪為欲廣施經畧匡復
帝室也夫用兵者何嘗不散而更合瘡愈更戰況今

未有所損豈可以一事不諧而衆謀頓廢乎今四方
顯顯視公此舉若未有所成遽復引歸民情失望各
懷去就勝負所在未可知也不若多為桴筏間以舟
楫數百里中皆為渡勢使顯不知所防一旦得渡必
立大功高道穆曰今若北歸使顯復得徵兵完聚養
虺成蛇悔無及矣榮乃使爾朱兆與賀拔勝縛筏夜
渡顯軍潰失據帥麾下南走慶之收衆結陣而還榮
追之慶之軍士死散畧盡乃削鬚髮為沙門間行還
建康中軍大都督楊津入宿殿中灑掃宮庭封閉府
庫出迎魏主子攸於北邙流涕謝罪子攸遂入洛陽
加榮天柱大將軍顯至臨潁為人所殺或復自歸於
魏主延明奔梁慶之自魏還特重北人朱异問之曰
吾始以為大江以北皆戎狄之鄉比至洛陽
乃知衣冠人物非江東所及也奈何輕之
音魚容反仰也義與喁喁同漢司馬相如傳延頸舉
踵喁喁然注口向上也桴筏音孚伐二者皆編竹木

集覽

顯顯

以浮江河而運物者小曰桴大曰筏養虺成蛇虺蜥
蜴之類博三寸首大如擘詩維虺維蛇陸佃曰虺似
蛇而小語云為虺弗摧為蛇奈質實長子按一統志
何北邙注見漢靈帝中平六年漢之縣名屬上
黨郡後魏分置樂陽縣北齊二縣俱廢隋開皇中置
冀氏縣屬潞州尋改為長子縣唐宋金元皆仍舊本
朝因之改屬潞州北邙山名在河南府城北一十里
山連偃師鞏孟津三縣綿亘四百餘里東漢諸陵及
唐宋名臣墳多在此臨潁漢之縣名屬潁川郡以在
潁水之上故名隋屬許州唐初屬殷州後復屬許州
宋金元皆仍其舊本朝因之改屬開封府

發明

顓未成乎君而亦以魏王書之顓固子攸之
類也使顓有成則一子攸子攸無成亦一顓

爾等而書之
夫豈過哉

秋七月魏以高道穆為中尉

魏主之姊壽陽公主行犯清路道穆擊破其車公主泣訴之魏主曰中尉清直豈可以私責之道穆見魏主魏主勞之道穆免冠謝

魏主曰朕愧卿卿何謝也

魏始鑄永安五銖錢

魏多細錢米斗幾直千高道穆上表曰在市八十一錢得銅一斤私造薄錢斤贏二百既示之以深利又隨之以重刑抵罪雖多姦鑄彌衆今錢徒有五銖之文而無二銖之實置之水上殆欲不沈此乃朝廷科防不切之過也宜改鑄大錢一斤七十文載年號以記其始則私鑄無利而自息矣楊侃亦乞聽官民竝鑄使民樂為而弊自改從之

魏巴州叛附于梁

初魏以梁益荒遠更立巴州以統諸獠凡二十餘萬戶以巴酋嚴始欣為刺史始欣貪暴諸獠反圍城行臺魏子建撫諭之乃散始欣恐獲罪陰請降梁子建因始欣既而魏以傅豎眼為行臺豎眼初至州人相賀既而病其子敬紹奢淫貪暴始欣賂敬紹得還巴州遂降于梁敬紹陰有保據南鄭之志誘山民圍城欲為內應圍合而謀泄將士殺之豎眼恥恚而卒

集覽

巴酋巴人之酋長也酋慈秋反

八月魏太保楊椿致仕

書法

椿自丁未求解都督於今三年矣一免於爾朱之酷再免於魏顥之忌於是而後致仕書

危之也而卒不免世隆之誣殺生於亂世難矣哉

○九月梁主捨身於同泰寺考異

按大通元年書梁主捨身此再捨身則捨

上當有再字

梁主幸同泰寺設大會釋御服持法衣行清淨大捨素牀瓦器乘小車役私人見為四衆講涅槃經羣臣以錢一億萬奉贖表請還宮三請乃許胡氏曰佛行有五要舍其一也梁武為帝王享天位內蓄姬妾外列官師富貴之崇子孫之衆宮室城池守衛之密猶以未足又命將出兵爭奪于外惟恐失之安在其能舍乎不惟君子非之為佛之道如達磨者亦不取也或曰然則達磨之言不亦可取歟曰為佛之道者淺深精麤雖所得不同要其極致歸於殄滅倫理以之為已則逆而不祥以之為人則偏而不公以之為天下國家蓋無所處而得其

集覽

四衆釋氏經云比丘比丘尼此出家二衆

也優婆塞優婆夷此在家二衆也比丘比丘尼注見
天監十七年優婆塞注見漢明帝永平八年優婆夷
其意與優婆塞同案梵語夷者華言女聲字也又謂
之鄔波斯迦涅槃經梵語涅槃華言示寂也佛以人
死其精神常存佛之死示寂滅而已非真死也多心
經注云梵語涅槃此云無為楞伽經云乃不生不死
之地一切脩行之所依歸也佛說施燈文云願一切
衆生皆得涅槃微妙光明言至涅槃者乃有微妙光
明世人認以為死非也達磨南天竺國人得般若多
羅傳正法眼藏曰當往震旦設大法樂遂泛重溟達
于南海梁武帝詔至金陵問道後潛回江正誤四衆
北止于嵩山少林寺面壁九年端坐而逝今按
綱目見為四衆講涅槃經通鑑本文云升講堂法座
為四部大衆開涅槃經題綱目改四部大衆為四衆
四當作士見字刊
誤當作親乃貶辭

書法

梁主再捨身矣於是親講涅槃經曷為不書書其重者則餘者畧之可也

魏討韓樓獲之幽州平

魏爾朱榮使大都督侯淵討韓樓配卒甚少或以為言榮曰侯淵臨機設變是其所長若總大衆未必能用淵遂廣張軍聲多設供具帥數百騎深入去薊百餘里值賊淵潛伏以乘其背大破之虜五千人皆還其馬仗縱使入城左右皆諫淵曰我兵少不可力戰為奇計以間之乃可克也度其已至帥騎夜進昧旦叩其城門樓果疑降卒為內應遂走追擒之詔以淵為平州刺史鎮范陽

万俟醜奴寇魏東秦州陷之○冬十一月就德興降魏

營州平○魏以城陽王徽為太保蕭贊為太尉長孫稚

為司徒○十二月梁以陳慶之為北兖州刺史

有妖賊僧彊自稱天子土豪蔡伯龍起兵應之衆至三萬攻陷北徐州慶之討斬之

庚辰梁中大通二年魏永春正月魏復取巴州○三月魏

遣都督爾朱天光討万俟醜奴夏四月獲之遂克高平

獲蕭寶寅皆誅之

万俟醜奴侵擾關中魏爾朱榮遣賀拔岳討之岳私謂其兄勝曰醜奴勍敵也攻之不勝固有罪勝之讒嫉將生願得爾朱氏一人為帥而佐之勝言於榮榮以爾朱天光為都督以岳及侯莫陳悅為左右都督配軍士千人岳擊赤水蜀賊得馬二千匹簡其壯健以充軍三月醜奴自將圍岐州遣尉遲菩薩攻圍趣

柵賀拔岳救之菩薩等已拔柵還岳故殺掠其吏民
以挑之菩薩帥步騎二萬至渭北岳以輕騎數十隔
水與語明日復引百餘騎與語稍引而東至水淺可
涉處岳即馳馬東出賊以為走棄步卒輕騎渡渭追
之岳依橫岡設伏待之賊半度岡東岳還擊之賊敗
走岳令賊下馬者勿殺賊悉投馬俄獲三千人馬亦
無遺遂擒菩薩仍渡渭北降步卒萬餘收其輜重醜
奴聞之棄岐州北走安定四月天光至汧渭之間停
軍牧馬宣言俟秋更進獲覘者縱之醜奴信之散衆
歸耕據險立柵天光知其勢分密嚴夜發黎明圍其
大柵拔之所得俘囚皆縱遣之諸柵皆降天光徑抵
安定醜奴走追及於平涼侯莫陳崇單騎入賊生擒
醜奴衆皆披靡後騎益集遂大破之天光進克高
平執蕭寶寅皆送洛陽賜寶寅死斬醜奴於市

集

覽

勅敵左傳勅敵之人注勅強也渠京反侯莫陳虜
三字姓本後魏別部之號居庫斛真水因氏焉尉

遲代北復姓本後魏別部之號因氏焉尉紆勿反

書法

魏自拔陵反後盜賊蠹起賊帥雖送洛斬之書死殺而已此其書誅何稱帝也寶寅始欲

伏魏復讐終乃反魏作亂其罪大矣不誅何以爲綱目

六月梁以元悅爲魏王○秋七月魏討万俟醜奴餘黨滅之三秦河渭瓜凉鄯州皆平

万俟醜奴既敗賊黨皆降唯万俟道洛帥衆逃入山中時高平大旱爾朱天光以馬乏草退屯城東五十里遣長孫邪利守原州道洛襲殺之天光帥諸軍赴之道洛戰敗帥衆入山據險自守爾朱榮以天光失邪利不獲道洛遣使杖之一百貶其官爵天光追擊道洛擒之阮其降卒萬七千人於是三秦河渭瓜凉

鄯州皆降乃質實河按一統志苻秦之州名隋改為復天光官爵抱罕郡唐復為河州天寶初改為

安鄉郡後陷于吐蕃宋收復置抱罕縣尋省為寧河寨後陞為縣屬秦鳳路金復置河州屬熙河路元為

河州路屬吐蕃宣尉司都元帥府至本朝改置河州衛軍民指揮使司隸陝西道渭後魏之州名後周併

為南安郡隋廢後復置隴西郡唐置渭州天寶初改隴西郡實應後陷于吐蕃宋皇祐中以渭州地置右

衛寨熙寧中改通遠軍崇寧中改鞏州金始為鞏昌府元初改為鞏昌路本朝改為鞏昌府隸陝西道瓜

後魏之州名隋改為燉煌郡唐復為瓜州後陷于吐蕃宋時為西夏所據元徙居民於肅州但名存而已

故城在陝西肅州衛城西五百二十六里涼漢之州名後魏改為武威郡隋復為涼州唐初為李軌所據

尋克平之復置涼州天寶初改武威郡宋改為西涼府元改為西涼州本朝改置涼州衛隸陝西行都指

揮使司鄯州後魏之所置後周改置樂都郡隋初郡廢置鄯州大業初州廢置西平郡唐因之治湟水縣上元間沒於吐蕃號青唐城宋收復置鄯州尋改為西寧州元屬亦集乃路本朝改置西寧衛屬陝西行都指揮使司

魏以宇文泰為征西將軍行原州事

宇文泰從賀拔岳入關以功遷征西將軍行原州事時關隴彫弊泰撫以恩信民皆感悅曰早遇宇文使君吾輩豈從亂乎
質實原州按一統志後魏所置隋改為高平郡唐初為原州後改平涼郡乾元初復為原州宋置鎮戍軍金改為州屬平涼府元改鎮原州屬鞏昌路以臨涇彭陽東山三州四縣省入本朝改州為縣屬平涼府

九月長星見

書法

綱目書長星六詳漢文帝九年舍是無書長星者矣

○魏爾朱榮至洛陽與太宰元天穆皆伏誅

魏爾朱榮雖居外藩遙制朝政魏主性勤政事數親覽辭訟理冤獄榮間之不悅魏主又與吏部尚書李神儁議清治選部榮嘗開補曲陽令神儁以階懸不奏榮大怒神儁懼辭位榮使其從弟僕射世隆攝選啓北人為河南諸州魏主未許太宰并州刺史元天穆曰天柱有大功若請晉代天下官恐陛下亦不得違魏主正色曰天柱若不為人臣朕亦須代若猶存臣節無代天下百官之理榮聞之大恚恨爾朱后性妬忌數忿恚曰天子由我家置立今便如此我父本即自作今亦復決魏主外逼於榮內迫於后恒怏怏

不樂幸寇盜未息與榮相持及聞關隴平謂臨淮王
或曰天下便無賊矣或曰臣恐賊平之後方勞聖慮
耳榮見四方無事累奏參軍許周勸臣取九錫臣已
斥去以諷朝廷魏主不欲與因稱歎其忠以答之榮
好獵不捨寒暑不避險阻士卒苦之天穆從容謂曰
王勲業已盛宜順時蒐狩何必盛夏馳逐感傷和氣
榮攘袂曰未能混一海內何得遽言勲業今秋欲與
兄戒勒士馬校獵嵩高令貪汙朝貴入圍搏虎仍出
魯陽悉擁生蠻北填六鎮明年簡精騎出江淮縛取
蕭衍然後奉天子巡四方乃可稱勲耳今不頻獵兵
士懈怠安可復用邪城陽王徽侍中李或勸魏主除
榮侍中楊侃僕射元羅膠東侯李侃晞亦預其謀會
榮請入朝徽等勸因其入刺殺之魏主疑未定而謀
頗泄人懷憂懼武衛將軍奚毅建義初往來通命魏
主期之甚重然猶以榮黨不敢與之言情毅曰若必
有變臣寧死陛下不能事拜胡魏主曰朕保天柱無

異心亦不忘卿忠款爾朱世隆疑有變乃為匿名書云天子欲殺天柱取以白榮榮恃其彊不以為意九月至洛陽魏主即欲殺之以天穆在并州恐為後患故思未發并召天穆人有告榮以魏主之謀榮具奏之魏主曰外人亦言王欲害我豈可信邪於是榮不自疑每入謁從數人不持兵仗魏主欲止城陽王徽曰縱不反亦何可耐況不可保邪先是長星入中台掃大角恒州人高榮祖曰除舊布新之象也榮甚悅至是郎中李顯和語人曰天柱至那無九錫都督郭羅察曰今年真可作禪文何但九錫榮下人皆陵侮魏主左右無所忌憚故其事皆上聞奚毅又見魏主求間魏主知其誠乃召城陽王徽及楊侃李彥告以毅語及天穆至魏主乃召中書舍人溫子昇告以毅榮狀并問以毅董卓事子昇具通本末魏主曰王允若赦涼州人必不至此良久又曰吾寧為高貴鄉公死不為常道鄉公生若殺榮與天穆而赦其黨亦應

不動耳應詔王道習曰爾朱世隆司馬子如朱元龍
特為榮所委任具知天下虛實亦不宜留徽侃皆曰
若世隆不全仲遠天光豈有來理魏主亦以為然乃
伏侃等十餘人於明光殿東榮與天穆竝入坐食未
訖起出事不果謀遂泄世隆又以告榮勸其速發榮
不聽然預謀者皆懼魏主患之城陽王徽曰以生太
子為辭榮必入矣魏主從之乃伏兵明光東序聲言
皇子生遣徽馳告榮榮遂與天穆俱入溫子昇預作
赦文執以出遇榮問之子昇色不變曰敕榮不取視
入坐李侃晞等抽刀從東戶入榮即起趨御坐魏主
先橫刀膝下遂手刃之天穆亦死內外喜譟百僚入
賀魏主登門大赦遣奚毅將兵鎮北中城是夜爾朱
世隆帥榮部曲走屯河陰初榮黨田怡聞變議攻宮
門賀拔勝止之及世隆走勝亦不從魏主甚嘉之朱
瑞雖為榮所委而善處朝廷之間魏主**集覽**苒苒春
亦善遇之故瑞從世隆走而中道逃還田曰苒

蒐索也擇取禽獸之不孕者冬田曰狩狩圍守也冬
物畢成獲則取之無所擇也契胡謂爾朱榮也契音
契如契丹契苾契骨皆東胡種魏道武帝登國初榮
之先羽健為領人酋長率契胡從平晉陽長星入中
台掃大角長星注見晉孝武帝太元二十年中台注
見晉惠帝永康元年大角注見漢成帝元延三年求
間為句猶言請問注見漢高后八年殺董卓事漢獻
帝時董卓篡謀已兆王允陰結卓將呂布為內應會
卓入朝布斬之王允若赦凉州人必不至此全本下
文云意謂殺榮即赦其黨皆應不動譬如王允既殺
董卓卓之將校多凉州人允乃議罷其軍故卓部將
李傕作亂殺允高貴鄉公三國魏主曹髦先封高貴
鄉公既立見司馬昭專權遂率僮僕鼓譟而出攻昭
被成濟即前弑之常道鄉公三國魏曹奐先封常道
鄉公高貴鄉公被弑司馬炎迎而立之是
為元帝後禪位于炎仲達爾朱世隆之兄
質實
山名

注見唐中宗嗣聖十二年魯陽縣名注見漢獻帝初平元年

發明

魏詡失德孽后亂朝潛行酖毒變生宮掖爾朱榮舉兵討之宜矣然而河陰之禍有寇賊

之所不為者今又謀行篡逆魏能取而戮之綱目正其伏誅之罪蓋亦幸之云爾然自魏晉而下如榮之比何可勝數成則為帝為王敗則伏尸都市天未厭亂使此徒得志天下未幾高歡宇文泰踵其故轍拓跋氏遂無噍類然皆榮之黨爾嗚呼安得以綱目之書榮者而書歡輩哉

魏僕射爾朱世隆反與汾州刺史爾朱兆立長廣王曄于長子冬十二月入洛陽遷其主子攸于晉陽而弑之

世隆欲還北司馬子如曰當此之際不可以弱示人若亟北走恐變生肘腋不如分兵守河橋還軍向京

師出其不意或可成功假使不得所欲亦足示有餘力使天下畏我之彊不敢叛散世隆從之攻河橋殺奚毅據北中城魏朝大懼高敖曹從榮至洛陽魏主引見勞勉之其兄乾亦自冀州馳赴洛陽魏主以乾為河北大使敖曹為直閭將軍使歸集鄉曲為形援送之河橋舉酒指水曰卿兄弟冀部豪傑能令士卒致死京城儻有變可為朕河上一揚塵乾垂涕受詔敖曹援劍起舞誓以必死十月世隆遣爾朱拂律歸將胡騎一千皆白服來郭下魏主遣謂之曰太原王立功不終陰圖釁逆罪止榮身餘皆不問若降官爵如故拂律歸曰願得太原王尸生死無恨因涕泣羣胡皆慟哭聲振城邑魏主募敢死士討世隆一日得萬人與拂律歸等戰於郭外不克魏主集羣臣博議皆懼不知所出散騎常侍李苗奮衣起曰今朝廷有不測之危正是忠臣烈士效節之日臣雖不武請以一旅之衆為陛下徑斷河橋魏主許之苗募人

從馬渚上流乘船夜下縱火船焚橋爾朱氏兵在南
岸者望之爭橋北度俄而橋斷溺死者甚衆苗泊小
渚南援不至爾朱氏就擊之苗赴水死世隆亦收兵
北遁詔行臺源子恭鎮太行丹谷築壘防之汾州刺
史爾朱兆聞榮死自汾州帥騎據晉陽世隆至長子
兆來會之共推太原太守長廣王曄即位王英之弟
子也世隆兄仲遠亦起兵徐州向洛陽魏主以城陽
王徽總統內外徽憂怖不知所出性多忌嫉羣臣有
獻策者輒勸勿納又斡財貨賞賜薄少或多而中減
或與而復追故徒有靡費而恩不感物十一月仲遠
陷西兗州賀拔勝與戰不勝降之初爾朱榮嘗從容
問左右曰一旦無我誰可主軍衆以兆對榮曰兆雖
勇然所將不過三千騎多則亂矣堪代我者唯賀六
渾耳因戒兆曰爾非其匹終當為其穿鼻乃以高歡
為晉州刺史及兆引兵向洛召歡歡曰兆狂愚如是
而敢為悖逆吾勢不得久事爾朱矣乃以山蜀未平

辭不至兆遂輕兵涉河騎叩宮門宿衛散走魏主步
出雲龍門外遇城陽王徽乘馬走屢呼之不顧而去
兆執魏主鎖之撲殺皇子縱兵大掠殺臨淮王彧等
徽齋金百斤馬五十匹以前洛陽令寇祖仁一門三
刺史皆已所引拔故往投之祖仁私謂子弟曰今日
富貴至矣乃怖徽云捕將至令其逃於他所使人於
路邀殺之送首於兆兆不之賞既而夢徽謂已曰我
有金二百斤馬百匹在祖仁家卿可取之兆即捕祖
仁依夢徵之不得殺之胡氏曰人死則氣散猶火焉
盡則光滅矣何為能見夢於人耶祖仁以怨報德刑
戮之民也不有人禍必有鬼責矣徽嘗持大權享富
貴其用物弘而取精多身雖死而其游散也緩且山
南距洛一日而近耳怨氣交魄理或有之也○世隆
仲遠皆至洛陽兆責世隆曰叔父在朝如何今天柱
受禍按劔瞋目聲色甚厲世隆遜謝然後得已由是
深恨之初魏主殺爾朱榮詔河西賊帥紇豆陵步蕃

襲秀容至是步蕃南下兵勢甚盛兆留世隆鎮洛陽
亟還晉陽以禦之遷魏主於晉陽高歡聞之帥騎邀
之不及因與兆書為陳禍福兆不納竟弒之三級佛
寺胡氏曰衰亂之朝宗室侯王為強臣所立未有得
令終者也若使敬宗當爾朱榮密迎之際能審彼已
有不受也受而足以興有不辭也辭而足以容其庶
幾耶夫榮養兵三世仗鉞六年其腹心爪牙之士衆
矣雖為人寵暴輕忽去之甚易而其族黨豈一赦所
能收也是則為榮所立弱亦不可強亦不可惟韜光
孫言確乎其不拔為可爾豈不難其人哉○初世隆
等徵兵於秦寧太守房謨謨斬其使及兆得志其黨
是蘭安定執謨繫州獄郡中蜀人聞之皆叛安定給
謨弱馬令往慰勞諸賊見謨遙拜謨先所乘馬別給
將士戰敗蜀人得之善養之兒童婦女競投草粟曰
此房公馬也世隆
聞之以為長史

集覽

一旅之衆禮小司徒會萬民
之卒伍而用之五人為伍五

伍為兩四兩為卒五卒為旅五旅為師五師為軍以起軍衆終當為其宰鼻穿鼻控制之義也後爾朱兆保秀容川果為高歡襲破之兆自殺撲殺撲弼角反謂投擲而擊殺之紇豆陵虜三字姓質實北城按一統志在懷慶府孟縣西南即下孟州是也

書法

兆亦反者也獨書世隆反何罪世隆也魏主之謀誅榮也曰殺榮與天穆而赦其黨榮既

伏誅魏主大赦世隆非其親弟必在赦例矣今乃首為亂階故特書反而書與汾州刺史爾朱兆云然則弒逆雖兆之罪而世隆亦與受其惡矣

發明

爾朱反逆人神憤怒元暉親北面子攸乃復立而代之既而亦不克終曷若力拒於初守

正而斃使亂臣賊子無以為倡禍之資乎綱目上書世隆反下書立暉則見暉為反者所立是亦反

逆之徒爾雖
欲自免難哉

魏紇豆陵步蕃大破爾朱兆於秀容兆及晉州刺史高
歡擊殺之兆使歡統六鎮

紇豆陵步蕃大破爾朱兆於秀容南逼晉陽兆懼使
人召高歡并力僚屬皆勸歡勿應召歡不聽遂行賀
拔馬過兒請緩行以弊之歡往往逗留步蕃兵日盛
兆屢敗告急歡乃往從之與兆進兵合擊大破斬之
兆德歡相與誓為兄弟詣歡宴飲初葛榮部衆流入
并肆者二十餘萬為契胡陵暴皆不聊生大小二十
六反誅夷者半猶謀亂不止兆患之問計於歡歡曰
六鎮反殘不可盡殺宜選腹心使統之有犯者罪其
帥則所罪者寡矣兆曰善誰可者賀拔允請使歡領
之歡毆允折齒曰天下事取捨在王何敢妄言請殺

之兆以歡為誠遂以其衆委焉歡以兆醉恐醒而悔之遂出宣言受委統州鎮兵可集汾東受號令乃建牙陽曲川軍士素惡兆而樂屬歡莫不皆至居無何又使劉貴請兆以并肆頻歲霜旱請令降戶就食山東兆從之慕容紹宗諫曰高公雄才蓋世復使握大兵於外譬如借蛟龍以雲雨將不可制矣兆曰有香火重誓何慮邪紹宗曰親兄弟尚不可信何論香火時兆左右已受歡金因稱紹宗與歡有隙兆怒因紹宗趣歡發歡道逢爾朱榮妻北鄉長公主自洛陽來有馬三百匹盡奪之兆聞之乃釋紹宗而問之紹宗曰此猶是掌握中物也兆乃自追歡至襄垣會漳水暴漲歡隔水拜曰借馬非他備山東盜耳王信讒來追今不辭渡水而死恐此衆便叛兆因輕馬度水謝歡引頸授刀使歡斫之歡大哭曰自天柱之薨賀六渾更何所仰但願大家千萬歲得伸力用耳大家何忍出此言兆乃投刀復斬白馬與歡為誓因留宿夜

飲尉景伏壯士欲執兆歡止之曰今殺之其黨必奔
歸聚結兵饑馬瘦不可與敵若英雄乘之而起則為
害滋甚兆雖驍勇兇悍無謀不足圖也旦日兆
歸營復召歡歡將詣之長史孫騰牽歡衣乃止
北鄉郡名天柱之薨爾朱榮為天柱大將軍被敬宗
手刃之大家天子之親近侍從稱天子曰大家此乃
高歡過呼爾朱
兆以驕之耳
質實
襄垣按一統志秦之縣名屬上
黨郡以趙襄子所築故名襄垣
漢因之後魏兼置襄垣郡北齊郡廢後周置韓州隋
初州罷以縣屬上黨郡唐改屬潞州宋屬隆德府金
屬潞州元仍舊本
朝因之仍屬潞州

書法

書兆使何幸之也曷為幸之歡不得六鎮則
爾朱未易亡也書曰兆使歡統六鎮天奪之

魄矣是故劉章封朱虛入宿衛而諸呂誅綱目書
曰太后封高歡得六鎮而爾朱滅綱目書曰兆使

皆莫之為
而為者也

魏齊州亂刺史蕭贊走死

齊州附于爾朱兆贊走卒於陽平梁人或竊其柩以歸梁主猶以子禮葬之陵次胡氏曰蕭綜之罪大矣梁武之不忍也桐棺三寸葬之中野不封不樹其可也子而附諸陵慈之過也

集覽 桐棺三寸葬之中野不封不樹左傳哀二年若其有罪絞縊以戮桐棺三寸無入于兆下卿之罰也注引記云夫子制於中都四寸之棺五寸之槨以斯知不欲速朽也鄭玄云此庶人之制也案禮上大夫棺八寸下大夫棺六寸無三寸棺制也棺用難朽之木桐木易壞不堪為棺故以為罰史記太史公曰墨者亦尚堯舜道言其送死桐棺三寸易繫辭曰古之葬者葬之中野不封不樹孔子家語王肅注云不聚土以起墳不樹松栢

也不封之不樹之
以為至卑無飾也

書法

於是齊州附爾朱兆贊走卒于陽平則不忍

足錄也故贊雖卒而從盜賊

例書死綱目之誅惡嚴矣

梁以陳慶之為南北司州刺史

慶之屢破魏兵遂罷義陽鎮兵停水陸漕運江湖
諸州竝得休息開田六千頃二年之後倉廩充實

辛梁中大通三年魏節閔帝春二月魏樂平王爾朱世
亥恭普泰元主朗中興元年

隆廢其主曄而立廣陵王恭

爾朱世隆兄弟密議以魏主曄疎遠無人望欲立近
親廣陵王恭羽之子也好學有志度以元叉擅權陽

得瘡疾郎中薛孝通說爾朱天光曰廣陵高祖猶子
夙有令望沈晦不言多歷年所若奉以為主則天人
允協矣天光使爾朱彥伯潛往脇之恭乃曰天何言
哉世隆等大喜乃廢曄而立之邢子才為赦文叙敬
宗枉殺爾朱榮之狀魏主曰永安手剪彊臣非為失
德直以天未厭亂故逢成濟之禍耳魏主閉口八年
至是乃言中外欣然以為明主詔以三皇稱皇五帝
稱帝三代稱王邇為冲挹自秦以來競稱皇帝今但
稱帝亦已褒矣初敬宗使史倅龍守太行及爾朱兆
南向倅龍先降兆遂乘勝入洛至是世隆論倅龍功
封千戶侯魏主曰於王**集覽**永安魏敬宗年號成濟
有功於國無勲竟不許**集覽**之禍注見漢後主景耀
三年

魏幽州行臺劉靈助反

靈助推算知爾朱氏將衰乃起兵云
劉氏當王幽瀛滄冀之民多從之
質實幽按一統志漢之州

名治薊縣元鳳初改為廣陽郡本始初更為廣陽國
東漢復為幽州三國魏改為燕國晉改為范陽國後
魏於薊立燕郡又於郡置幽州後周立總管於幽州
隋省州入涿郡唐初復為幽州開元中改州為范陽
郡乾元初復為幽州遼初改為幽都府後改為析津
府宋改為燕山府金改為大興府元改為大都路
本朝改為順天府直隸京師瀛後魏之州名治樂成
縣尋改為河間郡隋罷郡復置瀛州大業初改為河
間郡唐改瀛州天寶初仍為河間郡乾元初為瀛州
五代晉初入遼周復取之宋陞為河間府瀛海軍節
度元為河間路本朝改為河間府直隸京師滄後
魏之州名治南皮縣隋為渤海郡治陽信後徙治清
池唐改滄州天寶初改景城郡乾元初復置滄州唐
末置義昌軍五代梁改順化軍唐改橫海軍宋省長

蘆入清池金陞臨海軍屬河北東路元改隸河間路
本朝仍為滄州以清池縣省入改屬河間府冀東
漢之州名治信都縣晉改長樂國後魏改長樂郡隋
為信都郡唐改冀州尋改魏州後復舊名天寶初改
信都郡乾元初復為冀州治信都縣宋增置武安軍
金仍為冀州屬河間府元屬真定路本朝因之以信
都縣省入
屬真定府

魏河北大使高乾起兵信都以冀州迎高歡

乾與前河內太守封隆之等襲信都奉隆之行州事
為敬宗舉哀將士皆縞素升壇誓衆移檄州郡共討
爾朱氏殷州刺史爾朱羽生襲之高歡曹不暇探甲
將十餘騎馳擊之羽生敗走教曹馬稍絕世左右無
不一當百高歡叱壺開聲言討信都衆懼高乾曰吾
聞高晉州雄畧蓋世其志不居人下且爾朱無道弑

君虐民正是英雄立功之會今日之來必有深謀吾當輕馬迎之諸君勿懼乃潛謁歡於湓口說之曰爾朱酷逆痛結人神凡曰有知莫不思奮明公威德素著天下傾心若兵以義立則屈彊之徒不足為明公敵矣鄆州雖小戶口不減十萬穀結之稅足濟軍資願熟思之歡大悅與同帳寢初趙郡李顯甫喜豪俠集諸李數千家居殷州西山方五六十里顯甫卒子元忠繼之家素富多出貸求利元忠悉焚契免責鄉人敬之時盜賊蠭起清河人西戌還經趙郡以路梗共投元忠元忠遣奴為導賊皆避之及葛榮起元忠帥宗黨作壘以自保賊至輒擊却之榮乃悉衆攻圍執之賊平拜南趙郡太守好酒無政績及爾朱兆弑敬宗元忠棄官歸謀舉兵討之會高歡東出元忠乘露車載素箒濁酒以迎歡歡未即見元忠下車獨酌謂門者曰今聞國士到門不吐哺較洗其人可知還吾刺勿通也門者以告歡遽見之引入觴再行取箒

鼓之長歌慷慨歌闋謂歡曰天下形勢可見公猶事
爾朱邪歡曰富貴皆彼所致敢不盡節元忠曰非英
雄也歡曰趙郡醉矣使人扶出孫騰曰此君天遣來
不可違也歡乃復留與語元忠慷慨流涕歡亦悲不
自勝元忠因進策曰殷州小無糧仗不足以濟大事
若向冀州高乾邕兄弟必為明公主人殷州便以賜
委冀殷既合滄瀛幽定自當彌服矣歡急握元忠手
而謝焉歡至山東約勒士卒絲毫不犯遠近聞之亦
歸心焉至信都封隆之高乾納之高敖曹時在外畧
地間之以乾為婦人遺以布裘歡使子澄以子孫禮
見之敖曹**集覽**穀秸禾豪也秸紇黠反說文豪去其
乃與俱來皮曰秸以為席而祭天免責責讀曰

債通財也蠶起蠶與蜂通言盜賊之衆如蜂之飛起
也路梗道路阻塞也吐哺食在口中曰哺史記魯世
家周公戒伯禽曰我一沐三握髮一飯三吐哺起以
待士猶恐失天下之賢人鞍洗洗先典反說文灑足

也漢書沛公至高陽傳舍酈食其入謁沛公方踞牀令兩女洗食其曰必欲誅無道秦不宜踞見長者於是沛公輟洗延食其上坐謝之還吾刺是一句刺注見宋主昱元徽二年歌閨閨苦穴反曲終為閨前書張良傳歌閨注顏師古曰閨盡也布裘裘與質實殷裙通下裳也釋名云裘羣也言連接羣幅

按一統志晉初所置治獲嘉縣東魏置西脩武高齊移獲嘉治其城隋廢之唐初復置殷州後廢州以縣屬懷州宋元仍舊本

朝因之改屬衛輝府

書法

書起兵何惡爾朱也然則曷為不書討爾朱氏討爾朱者高歡也故此書以冀州迎高歡

下書高歡起兵討爾朱氏是乾之功止於迎歡而已安得以討予之

魏封其故主曄為東海王○魏以爾朱世隆為太保

時天光專制關右北奄有并汾仲遠擅命徐充世隆
居中用事競為貪暴而仲遠為尤甚所部富室多誣
以謀反沒其婦女財物而投其男子於河人畏之如
豺狼由是四方皆惡爾朱氏而憚其彊莫敢違也

集覽

并汾并卑盈反汾符分反二州皆在河東漢置
太原郡分置并州汾亦太原郡後魏置西河郡

兼置

質實

并州名注見齊明帝建武三年汾州名按
一統志後魏所置治蒲子城後移治西河

北齊改置南朔州後周改為介州隋初郡廢大業中
州廢復為西河郡治隰城縣唐初改浩州尋改汾州
天寶初改西河郡乾元初復為汾州屬河東道金置
汾陽軍節度元復為汾州屬太原路本朝以西河縣
省入隸
山西道

魏以高歡為渤海王質實

渤海郡名注見漢獻
帝建安八年南皮

魏封歡為渤海王徵之不至乃
以為東道大行臺冀州刺史

魏都督侯淵討劉靈助誅之

魏都督侯淵叱列延慶討劉靈助至回城淵畏其衆
欲據關拒險以待其變延慶曰不如出營城外詐言
西歸靈助聞之必自寬縱然後潛軍擊之往則成擒
矣淵從之出頓城西聲云欲還簡精騎一千夜發直
抵其壘靈助戰敗斬之初靈助起兵自占曰三月之
末我必入定州爾朱氏不久當滅至是首函入定州
果如其期

夏四月梁太子統卒

統自加元服梁主使省錄朝政辨析詐謬秋毫必賭
但令改正不加案劾斷獄多所全宥寬和容衆喜愠

不形於色好讀書屬文引接才俊不蓄聲樂每霖雨積雪遣左右周行閭巷視貧者賑之天性孝謹在東宮坐起恒西向母丁貴嬪卒水漿不入口腰帶十圍減削過半及寢疾恐貽梁主憂敕參問輒自力手書及卒朝野惋集覽加元服元首也謂加冠於首禮記愕謚曰昭明三加冠圖初加緇布冠欲其尚質次加皮弁欲其行三王之德三加爵弁欲其行敬事神明自力手書力疾而親手書寫

梁主立子綱為太子六月封孫歡為豫章王譽為河東

王譽為岳陽王考異

主字羨

初昭明太子葬丁貴嬪有道士云此地不利長子請厭之乃為蠟鵝及諸物埋於墓側宮監鮑邈之有寵於太子晚而見疎乃密啓梁主云太子有厭禱梁主遣檢掘得鵝物大驚將窮其事徐勉固諫而止但誅

道士由是太子終身慙憤不能自明及卒梁主欲立其長子華容公歡為嗣銜其舊事猶豫久之竟不立司馬公曰君子之於正道不可少頃離也不可跬步失也以昭明之孝武帝之慈一染嫌疑之迹身以憂死罪及後昆求吉得凶不可湔滌可不戒哉是以詭誕之士奇邪之術君子遠之○既而立太子母弟晉安王綱為太子朝野多以為不順侍郎周弘正以嘗為綱主簿乃奏記曰謙讓道廢多歷年所願殿下抗目夷之義執子臧之節改澆競之俗以大吳國之風綱不能從綱以徐摛為家令兼管記摛文體輕麗春坊學之時人謂之宮體梁主聞之怒召摛欲加誚責及見應對明敏意更釋然因問經史及釋教摛商較從橫梁主深嘆異之罷過日隆朱异不悅謂所親曰徐叟漸來見逼我須早為之所遂乘間白梁主曰摛老愛泉石意在一郡梁主謂摛真欲之乃謂曰新安大好山水遂出為守尋以人言不息封歡譽等以

慰其心久之鮑邈之坐事法不至死網追思昭明之冤揮淚誅之

集覽

厭之厭益涉反廣雅云厭

鎮也下厭禱音同奇邪之衍奇音羈邪本作衰周禮奇衰為民注云譎觚非常也疏云謂譎詐桀出觚角非常目夷之義目夷即司馬子魚春秋宋桓公庶子而太子茲父庶兄也桓公疾茲父請曰目夷長且仁君其立之公命子魚子魚辭曰能以國讓仁孰大焉臣不及也遂走而退子臧之節子臧春秋曹宣公庶子乃負芻之兄宣公卒負芻殺其太子而自立晉厲公執之諸侯以子臧賢欲立之子臧辭而奔宋吳國之風吳太伯及弟仲雍皆周太王子而王季歷之兄也季歷有聖子昌太王欲立季歷以及昌於是太伯仲雍皆奔荆蠻以避季歷自太伯十九世至壽夢有子四人幼曰季札季札賢壽夢欲立之季札讓不可遂棄其室而耕春坊文公語錄或問東宮官屬曰唐六典載太子東宮官置左右二春坊以領衆局猶朝

廷之中書
門下省也

書法

斥梁主何譏也何譏先是梁主信讒太子統終身慙憤不能自白及卒梁主欲立統子衡

其舊事不立立綱以是為梁主之私而非天下之公也故斥書主自是梁立太子不悉書據太子大

器終綱

目立太子斥書

主者四詳宋丙申年

魏冀州刺史高歡起兵討爾朱氏

歡將起兵討爾朱氏斛律金庫狄干與婁昭段榮皆勸成之歡乃詐為書稱爾朱兆將以六鎮人配契胡為部曲衆皆憂懼又為并州符徵兵討步落稽乃發萬人將遣之孫騰尉景為請留五日如此者再歡親送之郊雪涕執別衆號慟歡乃諭之曰與爾俱為失鄉客義同一家不意在上徵發乃爾今直西向已當

死後軍期又當死配國人又當死奈何衆曰唯有反耳歡曰然當推一人為主誰可者衆推歡歡曰爾不見葛榮乎雖有百萬之衆曾無法度終自敗滅今以吾為主當與前異毋得陵漢人犯軍令生死任吾則可不然不能為天下笑衆皆頌穎曰死生唯命歡乃椎牛饗士起兵信都亦未敢顯言叛爾朱氏也會李元忠舉兵逼殷州歡令高乾救之乾輕騎入見刺史爾朱羽生因斬之持首謁歡歡撫膺曰今日反決矣乃以元忠為殷州刺史抗表罪狀爾朱氏斛律金勣勒酋長也嘗為懷朔軍主行兵用匈奴法望塵知馬步多少嗅地知軍遠近

集覽

步落稽即稽胡也匈奴別種晉時劉元海五部之苗裔居河東之河

曲或云山戎赤狄之後也稽堅奚反

書法

氏者何舉族可誅也故不書主名是故霍氏舉族皆反則書氏爾朱氏舉族可誅則書氏

綱目一字之
筆削嚴矣

發明

爾朱弒逆恣行殺戮罪貫幽明人皆得而誅之
高歡雖故部曲義不得復徇其私討之宜

矣然其兵衆顧謂之反而歡亦以反自處大義不
明曲直顛倒如此遂至設詐以恐其衆不能顯明
爾朱弒殺之罪不亦過乎綱目書起兵書討回不
以歡之所自處者不正其名也此曲直之繩墨也

魏廣宗王爾朱天光殺侍中楊侃秋七月爾朱世隆殺
司空楊津太保楊椿夷其族津子惛奔信都

魏楊播及弟椿津皆有名德播剛毅椿津謙恭家世
孝友總麻同費男女百口人無間言椿津至三公一
門七太守三十二刺史敬宗之誅爾朱榮也播子侃
預其謀爾朱兆入洛侃乃逃歸華陰至是天光殺之

時椿以太保致仕在華陰津為司空在洛爾朱世隆誣奏楊氏謀反請收治之魏主不許世隆苦請不得已命有司檢案以聞世隆遂遣兵圍津第天光亦遣兵掩椿家東西之族皆滅魏主惋悵久之朝野無不痛憤唯津子惜適出獲免往見高歡泣訴家禍因為言討爾朱氏之策歡甚重之以為行臺郎中

梁賜其宗戚沐食鄉亭侯有差○冬十一月魏高歡立渤海太守元朗自為丞相敗爾朱兆等軍于廣阿

爾朱仲遠度律等聞高歡起兵不以為慮獨世隆憂之孫騰說歡曰今朝廷隔絕號令無所稟不權有所立衆將沮散歡乃立渤海太守元朗為帝朗以歡為丞相都督中外諸軍事高乾為侍中司空封拜有差爾朱仲遠軍陽平兆軍廣阿歡縱反問云世隆兄弟謀殺兆復云兆與歡同謀殺仲遠等由是迭相猜貳

徘徊不進仲遠等屢使斛斯椿賀拔勝往諭兆執
之仲遠等懼引兵南遁歡畏兆衆彊以問段韶韶曰
所謂衆者得衆人之死所謂彊者得天下之心爾朱
氏上弑天子中屠公卿下暴百姓王以順討逆如湯
沃雪何衆彊之有歡曰恐無天命不能濟耳韶曰爾
朱暴亂人心已去矣天意安得不從者哉歡遂進
戰大破

兆軍 集覽

陽平注見三國漢後主建興五年廣阿注見漢帝玄更始二年

魏南兖州人執刺史劉世明以降于梁梁遣歸魏

魏南兖州民劫刺史舉州降梁梁主以世明為征西
大將軍不受因請北歸至洛陽奉送所持節歸鄉里
不仕而卒

書法

執善辭曰力屈而被執也故降皆譏辭惟執
以降為非譏處變如世明者可以無愧矣故

書其歸元畧元或嘗自梁歸魏矣不書遣此書遣歸何善梁主也人執以來與來奔者異矣而能不奪其志宥而遣之梁主於是有君人之度焉書曰梁遣歸魏美梁也

壬梁中大通四年魏普泰二
子興二孝武帝脩永熙元年
春正月梁以袁昂為司

空○梁封西豐侯正德為臨賀王

正德自結於朱异
言正德失職故王之

魏丞相歡克相州以楊愔為行臺右丞

時文檄教令皆出於
愔及諮議參軍崔悛
集覽崔悛悛力膺反

二月梁以元法僧為東魏王○梁邵陵王綸有罪免為

庶人既而復之

綸為揚州刺史市物不給其直市皆閉邸少府丞何智通啓聞綸被責還第遣人刺智通事覺免為庶人鎖之三旬既而復之

書法

書既而復之何譏過慈也故槐里令朱雲言事得罪既而釋之為美矣邵陵王綸有罪免

既而復之則何以為譏辭得者不當得者也故釋之為美有者所實有者也故復之為譏

發明

梁主溺於浮屠一意不殺故每事姑息至其子弟有罪往往宥之入皆知其為慈愛之過

而不知其所謂慈愛者不但見之子弟而已然綱目於梁主姑息之事未嘗不顯書于冊如邵陵之類既當罪免又書既而復之則其寬縱之失固自曉然可知特書屢書亦所以為永鑒也

三月魏主朗入居于鄴高歡自為太師

書法

書魏主何成朗之為君也成朗之為君將以正罪歡也故自為太師則削其官至破殺爾

朱兆乃書大丞相

○閏月魏爾朱天光等會兵攻鄴高歡擊破之

爾朱世隆卑辭諭兆使之赴洛又請魏主恭納其女為后兆乃悅并與天光度律復相親睦將軍斛斯椿陰謂賀拔勝曰天下怨毒爾朱而吾等為之用亡無日矣不如圖之勝曰天光與兆各據一方去之不盡必為後患奈何椿曰此易致耳乃說世隆追天光等共討高歡天光不至使椿往邀之天光不得已從之將行問策於雍州刺史賀拔岳岳曰王家跨據三方士馬殷盛高歡烏合豈能為敵莫若且鎮關中以固

根本分遣銳師與衆軍合勢進可以克敵退可以自
全天光不從閏月天光自長安北自晉陽度律自洛
陽仲遠自東郡皆會于鄴衆號二十萬夾洹水而軍
高歡出頓紫陌高敖曹以部曲從歡曰高都督所將
皆漢兵恐不足集事欲割鮮卑千人雜之如何敖曹
曰敖曹所將練習已久前後格鬪不減鮮卑今若雜
之情不相洽勝則爭功退則推罪不願更配也歡馬
不滿二千步兵不滿三萬乃於韓陵為圓陳連牛驢
塞歸道以示必死北望見歡責以叛已歡曰本所以
戮力者共輔帝室今天子何在兆曰永安枉害天柱
我報讐耳歡曰以君殺臣何報之有今日義絕矣遂
戰歡將中軍敖曹將左弟岳將右歡戰不利兆等乘
之岳以五百騎衝其前別將斛律敦收散卒躡其後
敖曹以千騎橫擊之兆等大敗賀拔勝於陳降歡兆
對慕容紹宗撫膺曰不用公言以至於此欲輕騎西
走紹宗反旗鳴角收散卒成軍而去兆還晉陽仲遠

奔東郡度律集覽洹水注見周顯王三十六年紇陌
天光走洛陽地名括地志云在鄴城西案鄴城

今彰德府是也

夏四月魏將軍斛斯椿執爾朱天光度律送鄴世隆伏
誅仲遠奔梁

斛斯椿謂賈顯度顯智曰不先執爾朱氏吾屬死無
類矣於是入據河橋殺爾朱氏之黨度律天光出走
擒之送高歡又使顯智襲執世隆斬之魏主恭使中
書舍人盧辯勞歡於鄴歡使見魏主朗辯抗辭不從
歡不能奪侯景降于高歡爾朱仲遠奔梁仲遠帳下
喬寧張子期詣歡降歡責之曰仲遠為逆汝為戎首
仲遠南走汝復叛之事天子則不忠事仲遠則無信
犬馬尚識飼者汝曾犬馬之不如遂斬之集覽

戎首記檀弓曰毋為戎首注
云為兵主來攻伐曰戎首

魏雍州刺史賀拔岳誅爾朱顯壽

天光之東下也留其弟顯壽鎮長安召侯莫陳悅欲
與俱東岳知天光必敗欲留悅共圖顯壽宇文泰曰
悅雖為將不能制物若先說其衆必人有留心悅進
失爾朱之期退恐人情變動乘此說之事無不遂岳
喜從之悅與岳襲長安歡以岳為關西大
行臺岳以泰為左丞事無巨細皆委之

高歡入洛陽廢其主恭及朗而立平陽王脩自為大丞

相

魏主朗至邛山高歡以為疎遠使魏蘭根觀魏主恭
之為人欲復奉之蘭根以恭神采高明恐後難制勸

歡廢之歡集百官問所宜立莫有應者太僕蔡母雋
稱恭賢明宜主社稷歡將從之崔陵作色曰廣陵既
為逆臣所立何得為天子若從雋言王師何名義舉
歡遂幽恭於崇訓寺遂入洛陽斛斯椿謂賀拔勝曰
今天下事在吾與君耳若不先制人將為人所制高
歡初至圖之不難勝曰人有功而害之不祥椿乃止
時諸王多逃匿平陽王脩懷之子也匿於田舍歡欲
立之使斛斯椿求之椿從脩所親王思政見脩脩懼
曰賣我邪思政曰不也曰敢保之乎曰變態百端何
可保也歡乃為朗作詔策而禪位焉脩即位用代都
舊制以黑氍蒙七人歡居其一脩於氍上西向拜天
畢入御殿以高歡為大丞相天柱大將軍歡以司馬
子如為行臺尚書參知軍國徵賀拔岳為冀州刺史
岳欲入朝行臺右丞薛孝通曰歡方內撫羣雄外抗
勅敵安能去其巢穴與公爭關中之地乎公以華山
為城黃河為塹進可以兼山東退可以封函谷奈何

欲束手受制於人岳曰
集覽 蔡母注見齊明
君言是也乃不就徵
帝建武元年

書法

高歡自三月自為太師削其官矣此復不書
魏何歡伉也書廢其主多矣未有連書廢二

主者於是書曰廢其主
恭及朗歡罪可勝言哉

發明

元朗歡所立固歡之主也恭乃爾朱所立
何以併書為歡之主乎曰擾攘之際民不

可以無主恭雖爾朱所立然據京邑正尊位垂
及二載魏國固主之矣歡獨非魏之臣子乎使
歡正名仗義討除叛逆奉戴廣陵而君之社稷
有奉人神有主則朗固不必立也脩亦不必立
也何至期月之間三易其主哉雖然姦賊之徒
率以廢立示威歡雖討賊實亦賊爾等而書之
固非過也

魏爾朱度律天光伏誅

高歡還鄴送爾朱度律天光於洛陽斬之

五月魏封其故主朗為安定王○魏主修弒其故主恭

書法

廢主書弒多矣未有書其故主者書其故主何無爵也綱目之法廢主有爵書爵無爵書

其故主綱目書弒其故主二魏主恭西魏主欽

○秋七月魏大丞相歡討爾朱兆走之遂據晉陽

高歡擊爾朱兆軍於武鄉兆大掠晉陽兆走秀容并州平歡以晉陽四塞乃建大丞相府而居之質

實

武鄉縣名注見晉元帝大興四年晉陽縣名注見周威烈王二十三年秀容縣名注見晉安帝隆安

二年并州注見齊
明帝建武三年

書法

討爾朱兆正也因而據有晉陽則專甚矣
故書據書遂綱目於高歡自是無取焉

冬十一月魏主脩弒安定王朗東海王曄質實

安定郡
名注見

漢光武建武元年東海郡
名注見秦二世二年鄭

書法

恭書弒宜矣朗曄立數月耳其書弒何
一日亦君臣也魏主於是益三弒君矣

發明

是時高歡擅一國之權然恭朗曄之死皆歸
獄於魏主何也脩利於其位有爭國之心慮

貽後患故皆戕而滅之綱目推見至隱是
以書法如此脩雖欲曲辭其罪尚可得乎

○十二月魏主殺汝南王悅質實

汝南郡名注見漢
光武建武十九年

魏主以悅屬近
地尊故殺之

魏立后高氏

歡之
女也

御批資治通鑑綱目卷三十一

謹案第一頁後四行平王誅伯州黎按左傳誅伯州犂者靈王也此仍吳越春秋之誤

第十頁後一行五代晉改為鎮安州周改州為軍按五代史職方考陳州故屬忠武軍晉開運二年置鎮安軍漢初軍廢周廣順二年復之此以晉之置軍為改州者誤

第十三頁後三行定王使王孫滿勞楚子楚子問鼎大小輕重刊本楚子俱訛楚王據左傳改

第十六頁前四行中條山刊本中訛仲今改

第十八頁後二行唐改橫海軍按唐書方鎮表並
地理志橫海軍屢有廢置則是橫海之名不自
後唐始也此誤

第二十三頁前一行齊王芳改為華林園刊本華
訛鞏今改


第三十七頁前二行乃伏侃等十餘人於明光殿
東刊本明光訛光明據北史尙朱榮傳改

第四十一頁前五行賀拔焉過兒刊本焉訛馬據
北齊書及北史改

第四十二頁後五行注引記云夫子制於中都刊
本於訛作據左傳正義改

第四十四頁前七行從治清池刊本清訛青據隋
書改





總校官庶吉士臣張能照
校對官檢討臣王鍾健
謄錄監生臣蔣予林